

玉鏡臺

目錄

- | | |
|------|------|
| 第一齣 | 開場 |
| 第二齣 | 宴會 |
| 第三齣 | 探姑 |
| 第四齣 | 議婚 |
| 第五齣 | 刺繡 |
| 第六齣 | 請婚 |
| 第七齣 | 下鏡 |
| 第八齣 | 成婚 |
| 第九齣 | 石勒起兵 |
| 第十齣 | 王敦失守 |
| 第十一齣 | 慶賞 |

第十二齣 新亭流涕

第十三齣 聞雞起舞

第十四齣 石勒稱王

第十五齣 詔聘太真

第十六齣 絕裾辭母

第十七齣 赴官

第十八齣 母妻思憶

第十九齣 渡江擊楫

第二十齣 郭璞仙術

第二十一齣 燃犀

第二十二齣 閨思

第二十三齣 石勒報敗

第二十四齣 寄家書

第二十五齣 得書

第二十六齣 王敦反

第二十七齣 召太眞

第二十八齣 擊憤

第二十九齣 丹陽兵報

第三十齣 拘溫家屬

第三十一齣 繫獄

第三十二齣 獄吏相戒

第三十三齣 獄中寄書

第三十四齣 拆書見鏡

第三十五齣 敗王舍

第三十六齣 擒王敦

第三十七齣 蘇獄

第三十八齣 賞雪

第三十九齣 南北凱旋

第四十齣 完聚

玉鏡臺記

明朱鼎箸

第一齣 開場

〔燕臺春〕〔末上〕時序變遷。滄桑翻覆。乾坤幾見紛更。唐虞世遠。人馳蠅利蝸名。營營虛度浮生。賴扶植綱常。維持名教。中流砥柱。眼底誰能。古今詞傳。紛紛迭出。雕鏤矯揉。蟲技轟轟。更有朱絃囊錦。鶯簧三傳。調古音清。白雪陽春。金聲玉振。恁人聽。憑君看取。雄詞驚四座。壓倒羣英。

〔沁園春〕潤玉佳人。太真才子。下鏡成婚。適五胡作釁。神州陸沈。懷愍北狩。天馬南奔。奉詔勤王。絕裾辭母。夫婦萱堂兩處分。與劉祖同心協力。百戰淨邊塵。不意王敦叛逆。詭將心腹誘強臣。俾丹陽出守。聲罪致討。妻孥陷獄。難屈堅貞。義感說客。持書寄鏡。一怒鯨波盡削平。離鸞合。門迎具慶。天祿永承恩。〔下〕

第二齣 宴會

〔滿庭芳〕〔生扮溫嶠上〕篤志希賢。潛心樂道。十年研究遺編。靈椿早謝。萱草喜芳妍。且懇勸菽水。供子職。膝下承歡。念良姻。乘龍未遂。種玉尙無緣。鷓鴣天。經綸學業冠天人。胸次才猷邁等倫。韜匱久藏。和氏璧。潛蛟猶未際風雲。移巨楫。霑甘露。要將經略濟斯民。庭前愛日情尤重。五綵難教易縉紳。自家姓溫。名嶠。表字太真。世居晉陽。先人諱瞻。拜河東郡守。母崔氏。誥封恭人。慈親內治有方。坤儀合則。清白傳家。不墮韋平世業。詩書庭訓。式追孟母遺芳。正是門無黃金聘。家有白髮親。溫嶠今日正可承歡養志。報效劬勞。豈敢浮慕勛名。遺憂風木。但室家未遂。中饋乏人。這也不須愁他。男兒只要苦志燈窗。自有佳人。求爲匹配。正是娶妻莫恨無良媒。書中有女顏如玉。道猶未了。母親早上。〔老旦扮母上〕

〔逍遙樂〕逝景渾如箭。瞬息韶光知幾轉。孤鸞獨對困窮年。芝蘭未茂。華穀無傳。自慚孟母三遷。〔生〕天邊青鳥翩翩。苑上紅芳爛熳。〔合〕撫時對景且開顏。休將往事縈牽。〔見介老旦〕〔浣溪沙〕幾載孤幃守短檠。辛勤教子未成名。願看喬翻鷓鴣。〔生〕罔

極深恩報未能。孝思鄭重利名輕。何心願戀塵纓。〔老旦〕孩兒燈火十年。勳庸未遂。如之奈何。〔生〕

母親功名外物。何足爲意。佳景難逢。不宜虛度。幸喜母親福壽並臻。須當撫時觴慶。

〔集賢賓〕〔生〕青陽初試寒氣軟。東風簾幙輕翻。柳外啼鶯聲睨睨。看上苑桃腮紅染。韶華滿眼。瑤島上慶雲高現。〔進酒合〕金樽滿。須對此芳辰酬勸。〔老旦〕桑榆欲暮。嗟歲短。暗中跳擲金丸。鏡裏瀟瀟青鬢換。只望你飛騰霄漢。身揚姓顯。庶把我斷機名闡。〔合前〕

〔貓兒墜〕〔生〕堂前母老正可戲斑斕。麟閣浮名屬等閒。人生百行孝爲先。須憐。趁此餘齡。竭力承歡。〔老旦〕男兒立志期高遠。投筆封侯真可羨。休教戀戀在田園。休謙。趁此青春。快着雲鞭。

〔餘文〕韶光明媚真堪戀。只恐流年暗裏減。爲須早着看花眼。〔老旦〕孩兒從姑劉夫人。嬌居太原。久疎魚雁。汝宜暫輒講習之功。往彼一探。以慰我內外葭莩之情。〔生〕母親慈命。孩兒即便起程。

〔生〕漫對花前捧碧卮。

〔老旦〕欄杆春日影頻移。

〔生〕一番奔走風塵下。

〔合〕倏忽青陽又暮遲。

第三齣 探姑

〔薄倖〕〔貼扮劉母上〕鬢謝蘭膏容虛鸞鏡。庭除香滿紅芳掩映。杜重門幃空月

冷。〔旦扮劉女上〕清晝永。雕欄獨凭。倦柔肢繡絲無力。奉慈幃昏定晨省。〔貼〕九十

春光忽已半。海棠枝上紅簪遍。獨有未亡人。偏驚物候新。〔旦〕香閨人靜悄。清夜聞啼鳥。晨起事濃

妝。殷勤問高堂。〔貼〕老身溫氏。夫主劉綱。官拜前朝節度。不幸棄世多年。子現叨爲當朝太尉。干城

攸寄。祿位崇高。庶不負於先人。可傳芳于後葉。女潤玉。年方及笄。未遂有家。且喜德性幽閒。工容秀

麗。大則書數詞章。小則拈針刺繡。靡所不通。〔背〕觀他才貌兼全。爲須覓一快婿。孩兒自從父親喪

後。教育你兄妹成人。受了多少辛苦。

〔黃鶯兒〕風雨峭寒凝。困孤幃已半生。清燈獨秉黃昏靜。煢煢寡形。淹淹暮齡。

松筠節操寒猶勁。〔合〕強支撐。辛勤教子。聊可繼簪纓。〔旦〕花嶼曉歸青。聽黃鸝

似管笙。追隨幸值融和景。萱花遶屏。蘭枝蔭庭。華堂嘉瑞真堪慶。〔合〕對芳晨。

持觴祝誦。南極耀長庚。

〔簇御林〕〔老旦〕桑榆暮鶴鬢星。嘆朱顏易變更。人生聚散如飄梗。孩兒只恐怕青春易擲。當知徹。〔合〕細叮嚀。流光瞬息。無逸是儀刑。〔旦〕離襁褓初長成。嘆閨箴未諳經。子儀姆訓須三省。自兢兢勤慎戒荒寧。〔合前〕

〔菊花新〕〔生上〕布帆千里曳東風。山色湖光圖畫中。逆旅次新豐。盼龍門何日逢。自家拜違萱堂。來訪姑氏。不覺已到劉府。怎的無人在此。門上有片雲板。待我敲看。〔丑扮梅香上生〕煩乞通報。表姪溫太真相探。〔丑報介〕門外有個溫生來見。〔貼〕是表兄溫太真。你且迴避。〔旦下生見介〕浣溪沙。骨肉參商歲幾更。關山渺渺暮雲橫。遐思種種繫愁城。〔貼〕姑嫂當年離別輕。至今衡雁渺無聲。相逢聊可慰衷情。〔生〕小姪奉老母之命。遠來探望。且喜尊姑容顏如舊。五福俱全。可慰吾母惓惓之望。〔貼〕遠勞垂顧。途路風霜。自從別來。常常掛念。不知吾嫂近來安否。何如。

〔好姐姐〕〔生〕自從朱陳締盟。關河渺迢迢修綆。音塵阻絕。雙雁隔雲萍。〔合〕合

欣幸。幾年蹤跡潛形影。今日重逢喜氣盈。〔貼〕老身孀居可矜。念孤兒牽名邊境。深閨弱息。及笄未施衿。〔合前〕梅香繡房中引出小姐拜見。溫兒。〔旦上〕綺窗把繡絲暫停。將母命金鈿重整。忙移蓮步。〔做羞見退介〕羞臉怯趨迎。〔貼〕孩兒內外至親。何須羞避。過來相見。〔見介合〕合欽敬。義屬葭李。懇懃着悃誠。〔貼〕孩兒。溫太真廊廟之才。瑚璉之器。汝當誌之。太真他是當時俊英。況又有閨闈門屏。一朝騰踏。唾手覓公卿。〔合前貼〕賢姪。旣蒙光降。暫留賓館。一則可以款敘闊情。二則可以溫習經史。不必阻推。叫書童引去。

〔生〕幾年蹤跡隔衡陽。

〔旦〕不見渾如參與商。

〔生〕今日不知何夕也。

〔貼〕與君共此燭燈光。

第四齣 議婚

〔未扮院子上〕曾是皇家幾世侯。入雲高第照神州。柳遮門戶橫金鎖。花擁笙歌咽畫樓。小人乃是劉太尉府中一個院子。昨日奉老夫人嚴命。叫我灑掃院落。整理圖書。設南洲之榻。開東閣之筵。以

候溫公子。若論我相公。累代富貴。眞個閱閱冠層霄。家聲蓋六合。怎見得。但見千尋甲第。數尺椽題。
飛棟逼丹霞。嵬簷參碧落。髣髴臨春結綺。參差得月。齊雲。遶城波色樓臺湧。滿座山光劍戟搖。桂苑
蘭宮。緯布三辰之秀。金鰲玉宇。聯鍾五岳之英。簾幙捲東風。翔集遷鶯賀燕。軒楹敞南岳。爭看起鳳
騰蛟。四十里紫絲步障。綺陌輝煌。疑是蓬萊閩苑。十數枚照乘明珠。夜光燦爛。渾如貝闕龍宮。千斯
箱。萬斯倉。斂粟帛如山積。脂爲壁。蠟爲薪。等黃金同土價。日食萬錢難下筯。畫堂內簪履三千。眞珠
三斛買歌姬。繡屏前金釵十二。只見桃李滿門牆。眞個珠璣列華屋。謾誇富貴繁華。且說書齋景致。
但見雪案溶溶。塵埃絕跡。芸窗湛湛。香霧烟凝。架插金藤。八萬卷積案象風雲。几盈玉牒。三十束連
編形月露。翠幕中收貯錦囊綺籍。何殊天祿石渠。芸閣內珍藏玉軸牙籤。賽過同文翰苑。燃青藜以
照夜。明燭奎文。繼日晷而焚膏。光傳太乙。鳳銜揮碧落。筆陣花生五色文。龍壁起雲烟。墨池紋湧三
層浪。看他累朝科甲相仍。賴此書香遠繼。果是鎮家寶藏。豈應獨羨贏金。鋪設已完。公子早上。〔末
下〕

〔風入松〕〔生上〕并州客子憶咸陽。更日斷衡湘。蘋蘩無寄堪惆悵。溫清隔問

音疎曠。音接喜開東閣。夢魂只在高堂。堂上舞衣悲乍冷。卿雲望望無鴻影。主人傾蓋雖

多情。王孫豈敢忘歸省。小生蒙姑母留止賓幄。禮意勤懇。但心繫北堂。不安寢食。不免乘此清閒。遍觀臺榭。博覽羣書。消遣旅懷則個。

〔解三醒〕我抱經綸久。辭鸚薦。冲霄志暫戡修翰。只因萱室桑榆短。甘養志與承顏。窮經須把分陰惜。論道還當希聖賢。勞眵勉。須學取簞瓢陋巷。暫樂田園。昨見表妹。才貌無雙。觀此窈窕之淑女。堪爲君子之好逑。弱冠未諧中饋選。繡幙紅絲尙未牽。瓊樓美人多婉孌。我欲將白璧種藍田。只恐月下書難檢。紅葉題詩誰與傳。空懸念。怎得那吹簫秦女。跨鳳乘鸞。

〔霜天曉角〕〔貼上〕高軒垂聘。下榻忙承應。雜佩慚無相贈。休教彈鋏生嗔。〔見介〕賢姪。陋室荒村。飲膳涼薄。多慢多慢。〔生〕寒儒重蒙厚款。心甚不安。將欲告辭歸矣。〔貼〕請留數日。老身有一切已事相干。未敢啟齒。〔生〕願聞。〔貼〕自古道男大當婚。女長須嫁。潤玉年已及笄。要覓一婿。斧柯之任。相屬何如。〔生背呀〕小生正有請婚之意。未敢擅言。今蒙委及。不免乘機而發。

姑母。佳婿難得。欲求其人。如嶠比者何如。〔貼背介〕太真初來。吾已注意。只恐孩兒之德非配。故此
逡巡未發。今觀此言。渠亦有意。賢姪。吾女卜婿。豈敢希汝爲比。倘果得如溫郎。三生幸也。

〔啄木兒〕〔貼〕吾女呵。他有松筠操。冰玉顏。燕婉難逢。甥館閒。仗冰人懋選東牀。
使吾女獲配英賢。庶不負侯門鈞眷。吾女果得婿如溫郎呵。正是孟光得遇梁鴻選。
好教他舉案齊眉傲鳳鸞。〔生〕令愛呵。他是瑤池侶。玉籍仙。相府門楣誰不羨。只
恐着蟾闕難登。誰敢把丹桂高扳。〔背介〕此緣若非溫嶠。其他豈佳偶也。鳳卜鸞盟須
自薦。女貌郎才應無忝。不枉了千載奇逢宿世緣。〔背介〕既以受委。暫且承命。姑母。溫

嶠此去。卽當慎擇賢才。以充其選。〔貼〕多謝。〔生〕奉命臺前議結親。〔貼〕伐柯執斧總憑君。〔生〕再
三不用親囑付。料想也是會中人。〔生下。貼弔場〕梅香。叫老院子過來。〔末上〕有福之人人伏事。無
福之人伏事人。覆老夫人喏。〔貼〕院子。我已分付溫公子與小姐選婿。你可去結綵樓。開繡幙。若有
青年才子如溫生者。方許應選。〔末〕老夫人差矣。門下既有溫郎。天下才子。無出其右。何不就將小
姐嫁他。又令擇之他處。正所謂道在邇而求諸遠矣。〔丑〕自古道見鐘不打。又去尋銅。今溫郎青春

年少。小姐美貌芳年。天生一對夫妻。老夫人快招他做姐夫。好帶挈梅香哩。〔貼〕你二人之言皆有理。但男女非行媒不知名。非受幣不交親。我於溫郎。非無此意。但媒聘未通。難以出言。你且設餌待魚。若有天緣。自當契合。

〔貼〕孔雀屏開燭影紅。

〔末〕會看佳婿近乘龍。

〔丑〕有緣千里能相會。

〔合〕無緣對面不相逢。

第五齣 刺繡

〔花心動〕〔旦上〕日上紗窗對菱花筓總。雙蛾濃畫。輕拂羅衫。低垂簾幙。高堂問寢初罷。〔丑扮梅香上〕傷春兀自無聊賴。侍巾箱勤勞炊爨。守箴規不出閨門之外。〔畫堂春〕〔旦〕東風吹柳日初長。雨餘芳草斜陽。〔丑〕杏花零亂燕泥香。睡損紅妝。〔旦〕寶篆暗消蘭麝。畫屏縈遶瀟湘。〔丑〕曉寒輕透薄羅裳。無限思量。〔旦〕奴家生長閨門。克遵姆訓。繡幙低垂。不管繁華春色。重門深鎖。惟貪針指工夫。昨日溫秀才來看母親。偶爾一見。觀他丰姿秀麗。禮度雍容。真廟廊偉器。誠恐蛟龍得雲雨。終非池中物也。〔丑〕小姐。溫公子有宋玉之才。潘安之貌。小姐

何不告過老夫人。就招他爲姐夫。卻不是好。〔旦〕賤人無恥。女子之嫁也。母命之。老夫人未有此意。怎麼叫我開得口。〔丑〕小姐自家難說。待秋蘭去告老夫人何如。〔旦〕呀。這婚姻事。豈是你小賤人說得的。你好好去安排繡牀。隨我學習女工便了。〔丑〕小姐。你又苦惱我也。〔旦〕賤人。執麻桌治絲繭。都是你分內事。有甚苦惱。〔丑〕小姐。你滿頭珠翠。遍身綺羅。何不自享安逸。務要苦自勞神。〔旦〕豈不聞詩有幽風之規。書有無逸之戒。自古帝后王妃。尙然不費蠶織。何況於我。我今日豈可恃此富貴。而溺於宴安乎。〔丑〕小姐極是。只是秋蘭春心蕩漾。天氣困人。其實當不得這勞苦。〔旦〕賤人不知勞者不久逸。你今日若不辛苦。怎得後日安樂。今後再不許說此話。我若告過老夫人。好生懲治你這賤人。〔丑〕小姐見憐。秋蘭再不敢了。〔刺繡介旦〕

〔桂枝香〕繡針紉線。輕鋪巧。繡成黼黻文章。和那色絲黃絹。看日遲晝長。日遲晝長。風薰羅幔。稍覺意慵心懶。〔丑〕小姐。你且休息休息。〔旦〕莫偷閒。簷前寸晷難留住。花影俄然上畫欄。〔丑〕紅消翠減。神疲力謫。繡不就鸞鳳雙飛。和那鴛鴦作伴。謾停針暗傷。停針暗傷。惹得我芳心繚亂。〔長吁介〕好苦呵。受人羈絆。轉

憂煎人生浮世如春夢。何苦營營誤少年。〔旦〕姆儀婉變。須當阻勉。賤人你休惹着飛絮游絲。閒藤野蔓。爲婦人女子呵。惟勤組紉。惟勤組紉。何須扼腕。休辭勞倦。聽吾言。飛花任自隨流水。蘭蕙依然春自妍。〔丑〕娘行懲勸。勲勞何憚。從今收斂春心。再不把紅綃寫怨。任流鶯亂啼。流鶯亂啼。蜂狂蝶戀。何心顧盼。更拳拳抱衾甘受宵征苦。流落黃裳最可憐。

〔旦〕庭院重重春晝深。

〔丑〕隔窗斜日轉花陰。

〔旦〕停針默默嬌無語。

〔合〕徙倚欄杆思不禁。

第六齣 請婚

〔未扮院子上〕金屋深沈貯阿嬌。吹簫奏女彈雲翹。早教翡翠聞王母。不許烏鳶噪鵲橋。受人之托。必當終人之事。老夫人差我結綵樓。選婿發放。要如溫公子這等人才。方許赴選東牀。只怕難得。遠望見一人擺將來了。看何如。〔淨扮富翁上〕

〔普賢歌〕田連阡陌氣豪迂。囊裏黃金積有餘。石崇那罕稀。陶朱總不如。彩鳳

求凰吾是侶。人人嘲我守錢奴。豪富冠神都。營營錢樹子。孳孳盜跖徒。孔方結兄弟。金穴乃我居。聚斂鴟夷子。征商賤丈夫。貪婪如劫奪。竊取勝穿窬。但知金玉貴。那曉聖賢書。〔末〕又道人不通古今。馬牛而襟裾。〔淨笑介〕只求倉廩實。誰笑腹空虛。文君如選婿。我是馬相如。〔末笑介〕只怕外相如內不相如。又有一位來了。衣服且是齊整。〔丑扮公子上〕

〔水底魚兒〕陰囊勳資。家聲振九衢。風流豪俠。門盈駟馬車。俺自家貴介本官餘。膏梁環綺襦。世世襲華轂。潭潭府中居。生來靠祖父。身不負犁鋤。肺腑藏白叟。形骸血肉軀。意度頗驕縱。物色何豪腴。侯門選才子。我是千里駒。〔末〕只恐君才非良馬。磨中之黔馿。〔丑笑介〕笑罵從他口。好官我爲之。〔淨丑〕我二人一富一貴。名門大族。聞知府中招婿。特來赴選。〔末〕二位家勢。果是當今第一。只一件。老夫人道。小姐有傾國傾城之貌。不可容易許人。定要考一考。〔淨〕考不難。小子有不醉之量。兼人之餐。人人號我酒囊飯袋。那怕搞。〔丑〕小子更高。日食一萬錢。夜傾三百盞。人人號我鋪啜之徒。隨你搞。〔末〕二位乃飲食之人。食粟而已。非是搞酒飯。要考才。〔淨〕這個一發不打緊。我家貨殖致富。資擬王公。人皆稱我爲多田翁。真是菽粟盈太倉。黃金滿中庫。〔丑〕我家祖父在

任。竭民膏血。捲起地皮。真個位高金多。胡椒八百石。鍾乳三千斤。若要考財。我二人最多。〔末〕又道不義之富貴。於我如浮雲。我說的非是雙財。要單才。〔淨〕腰纏十萬貫。此乃是擔財。〔末〕不是。要你肚裏的才。〔丑〕身居黃金屋。口食千鍾粟。這不是肚裏財。〔末〕二位說來說去。只說金銀。我家不要金銀。只要詩文。〔淨〕杜詩李詩。不如細絲。韓文柳文。不如松文。古人道得好。黃金置身貴。文章不療飢。又道紈褲不餓死。儒冠多誤身。古人說話。那一句不說錢財好。要甚麼文才。〔末〕我太尉是詩禮之家。與別人不同。只要書。不要財。〔丑〕你就說書怎見高。財怎見低。〔末〕書有香。銅有臭。二位乃人間臭物。請退請退。〔淨〕

〔駐雲飛〕我富擬王侯。金谷園中名最優。囊橐多豐厚。喬木吾稱首。嚟。肥馬與輕裘。朱輪輻輳。爭奈路阻藍橋。玉兔空杵臼。自訝明珠惜暗投。〔丑〕畫轂鳴騶。紈褲相仍逞貴游。世祿誇勳舊。冠蓋稱華胄。嚟。聲勢蓋皇州。丰姿魁秀。爭奈夢斷陽臺。雲黯巫山岫。花落無心逐水流。〔末〕繡幕紅樓。好選英賢作好逑。〔淨〕如今做親的只貪財主。〔末〕銅臭非佳耦。〔丑〕如今做親的只貪官家。〔末〕乳臭非良友。嚟。

野鷺豈鸞儔。名珠難售。怎教窈窕佳人。流落庸人婦。正是紅葉無情出御溝。
〔下淨丑〕親事不成。回去回去。釣罷綸收。此處無魚別下鉤。種玉難成就。待兔空
株守。嗟。無分探瀛州。空教仰斗。下第歸家。季子顏何厚。難洗今朝一面羞。

〔淨〕侯門有女選郎才。

〔末內應〕俗子無緣莫入來。

〔丑〕夜靜水寒魚不食。

〔合〕滿船空載月明回。

第七齣 下鏡

〔金瓏璫〕〔貼上設繡幙〕門闌增喜慶。鵲橋高駕瓊楹。占鳳卜。聽鸞盟。〔旦〕繁花
團繡影。綺羅簇擁金屏。絃管沸。瑞烟凝。〔貼〕手捲真珠上玉鉤。重重步障罩紅樓。青鳥未
傳雲外信。思悠悠。〔旦〕繡幙層層繫綵球。天桃灼灼覆瀛洲。結祝未堪承母命。覺含羞。〔貼〕孩兒前
日委托太真爲汝選配。未見回報。梅香。蘭房錦瑟。花燭綺筵。不知完備了未。〔丑〕伏老夫人。俱已完
備了。〔貼〕

〔鎖南枝〕你看蘭房裏。錦瑟傍。香風瑞烟迴幃帳。結綺候仙郎。三星照羅幌。桃

腮豔蓮炬煌。弄玉已乘鳳。簫郎早臨降。〔旦〕開寶匣。壓錦妝。鴛幃鵲屏總羞向。探藻幼何當。結綺心悒快。我若離了膝下呵。晨昏裏。誰奉養。戀戀在萱堂。難教我暫疎曠。

〔生查子〕〔生帶玉鏡上〕淑女選才郎。門閥誰能稱。自薦入東牀。玉鏡聊爲聘。自家謹承姑命。選擇門楣。我思量起來。以表妹之貌。配溫嶠之才。真爲天作之合。豈可令他人得之。今去見姑母。竟當自薦。以此鏡爲聘。成就這段佳姻。有何不美。梅香通報。〔貼出幕前見生介〕所托之事。今竟何如。〔生〕告姑母。已得人矣。門第才望。不減如小生。〔貼〕何人。〔生〕便是溫嶠。〔貼笑介〕老身久有此意。莫非天也。既如此。就令小女事君。以執箕箒。〔淨扮媒婆上生出鏡介〕荷蒙不鄙。愧乏白璧黃金。止有玉鏡臺一面。以爲聘禮。〔貼〕收了。〔生拜介〕寒門衰陋。鄙人幸蒙不遺葑菲。得與館甥之選。竊恐有玷名門。貽羞淑女。〔貼〕太真說那里話。小女蒲柳之姿。得事君子。正謂門闈多喜色。女婿近乘龍。何須過謙。〔叫介〕孩兒多承太真不棄。汝身得有所托。過來相見。〔旦含羞投扇笑介〕我固疑此奴。今果如所卜。〔下丑〕小姐招得這個好郎君。十分歡喜。莫說小姐歡喜。衆梅香皆歡喜。

〔笑下貼〕

〔香柳娘〕喜門迎席珍。門迎席珍。冰清玉潤。汝二人匹配。可謂相宜。佳人才子堪合。香。汝金玉可親。金玉可親。懷抱濟川才。胸中飽經蘊。〔合〕況渭陽舊姻。渭陽舊姻。世結朱陳。堪諧秦晉。〔生〕我本儂荒鄙人。儂荒鄙人。才非英雋。布韋未及明時奮。荷高門汲引。高門汲引。甥館迭爲賓。何當此榮進。〔合前〕

〔生〕昔年曾向玉京游。

一飲瓊漿意氣投。

〔貼〕今日得成秦晉約。

〔合〕早教織女會牽牛。

第八齣 成婚

〔傳言玉女〕〔貼上〕寶鼎烟迷。紅雲呈瑞。畫堂前重裊疊翠。牛郎和織女。今夜鵲橋重會。標梅初實。桃夭時值。院子何在。〔未上〕帳前新綰鴛鴦帶。堂上初開玳瑁筵。滿巫山峯十二。門迎珠履客三千。伏老夫人。有何使令。〔貼〕今日與小姐畢姻。筵席安排了未。〔未〕安排完備了。〔貼〕怎見得。〔未〕〔西江月〕但見翠幃金屏燦爛。寶璫玉珮鏗鏘。珊瑚枕上繡鴛鴦。花底

香風蕩漾。玉瑣平鋪紈袴。青墀鼎沸絲簧。洞房花燭夜。煌。爭看神仙儀仗。〔貼〕有甚麼酒饌。
〔末〕〔臨江曲〕雞距猩脣羅五鼎。紅肥錦縷飛霜。肉臺盆內總膏粱。珍庖調玉脰。仙府飲瓊漿。玉
璫流霞蘭葉翠。烟浮蟻綠鵝黃。蘭陵美品鬱金香。松醪盛玉碗。結盞候仙郎。〔末下貼〕請親母新郎
出來。〔老旦上〕

〔女冠子〕高門垂庇。蓬茅頃刻生輝。〔生上〕風雲未際。鰥生未遇。姻媿承恩。慚
非佳婿。〔老旦〕請新人出拜堂。〔旦上〕妝罷還羞愧。桃腮紅襯。蓮步輕移。〔合〕陰陽今
托始。千載奇逢。人生得意。〔夫妻對立介丑揭蓋頭介唱〕三尺紅羅覆綠鬢。蓋頭高揭露朱顏。

嬌羞斂衽低頭立。俊俏才郎偷眼看。囉哩哩囉哩。〔丑喝拜淨〕竊以窈窕佳人。委實蘭房之秀。象賢
庶士。乃爲席上之珍。邇者神相其成。天作之合。一雙兩好。綢繆宜合於瑟琴。二姓百年。燕婉喜諧乎
伉儷。噦噦兮桐岡之鳳。關關焉河上之鳩。予以采藻。予以采蘋。克謹蒸嘗之薦。載弄之璋。載弄之瓦。
早膺莞篋之祥。伏願姑嫜交慶。家室攸宜。螽斯秩秩。麟趾振振。〔拜介〕禮儀已畢。夫婦請飲交杯酒。

〔生〕

〔畫眉序〕繡幙繫紅絲。畫燭行行照羅綺。愧塵凡何幸。獲配仙姝。遶銀屏隊隊紅妝。列華屋繩繩珠履。〔合〕良緣喜下妝臺鏡。庭前彩鳳來儀。〔旦〕鋪翠壓瓊脂。玉樹交加結連理。慕荆釵德耀。舉案齊眉。愧我非金屋嬋娟。喜得遇象賢公子。〔合前老旦〕下嫁屈王姬。賢助真堪主中饋。見門盈百輛。化洽關雎。幸喜得種玉連城。須及早鳴珂帝里。〔合前貼〕輪御結矜禱。孔雀屏開締佳士。看東牀坦腹。慶洽門楣。產嘉瑞天上麒麟。新物色門牆桃李。〔合前丑〕

〔滴溜子〕郎君是郎君。是燕山桂枝。小姐是小姐。是飛瓊伴侶。雙雙同諧伉儷。匹配總堪奇。如魚似水。管取熊羆早叶夢裏。〔生旦〕

〔太和佛〕帶結同心花共蒂。聯袂酌金卮。瑟琴在御。夫唱婦相隨。偕老百年期。〔合〕齊看取。佳人才子兩相宜。〔貼老旦〕銀海瓊舟浮綠醴。人人如在瑤池香生枕簟。今夜花燭共歡娛。他年金榜標名字。〔合〕齊慶取。佳兒佳婦世間稀。〔合〕〔雙勝子〕蘭房裏。蘭房裏。春光好。花容媚。瑤臺上。瑤臺上。笙簧巧。歌聲細。銀缸

爛。銀缸爛。香篆灩。香篆灩。看交孟酬勸。歛醉扶歸。

〔餘文〕山盟海誓今宵締。美貌芳年正及時。樂事人間能有幾。

〔生〕雙星今夜。渡銀河。

〔旦〕喬木枝頭繫女蘿。

〔老〕細看月輪還有意。

〔合〕定教丹桂近姮娥。

第九齣 石勒起兵

〔北點絳脣〕〔淨扮石勒同卒上〕蓋世英雄。風生叱咤真驍勇。番漢雲從。鼙鼓漁陽動。秉握乾符起遠陞。帳前初建九旂旗。丈夫志氣掀天地。鬱鬱安能守一隅。自家姓石。名勒。表字季龍。

世爲西番部長。自歸晉后。遷居上黨。經今數世。臣節不虧。近因司馬氏骨肉相殘。紀綱廢弛。九川幅裂。四海鼎沸。俺自起兵已來。旬月之間。衆至四十餘萬。一鼓已下常山。鉅鹿數郡。并州諸胡羯。盡皆歸降。如今就要起兵。約同劉耀長驅中原。不免叫出謀主張賓大將石生與他相議。二臣何在。〔外扮張賓上〕受圖黃石老。學劍白猿公。〔丑扮石生上〕摧鋒萬人敵。略地兩隅空。〔外丑〕伏將軍。有何分付。〔淨〕張謀主。你可同石生統領大衆。約會始安王劉耀。攻取洛陽。執了晉帝。中分天下。星夜

就道不可有違。〔外丑〕領鈞旨〔淨〕

〔北雁兒落〕率五丁振旅出幽并。驅千乘閩外承軍令。拂青萍光射斗牛星。敲金鐙聲振空山應。〔外〕陣前兵列着六花形。馬上旌藏着雙燭影。任縱橫虎鬪與龍爭。肆憑陵拓地收藩屏。〔丑〕

〔得勝令〕烈轟轟羯鼓震天鳴。沸騰騰鐵馬追風騁。亂紛紛犀象壯軍聲。密密層層旗纛遮天冥。奮武威北伐南征。國破城平。直待要立馬吳山頂。真個是將猛兵勅。入中原遷周鼎。〔丑〕氣崢嶸跨海噬長鯨。喧嚇嚇飛騎過葱嶺。黑黯黯蠻雨暗江汀。白茫茫瘴霧迷山徑。喊一聲日墜天傾。地裂山崩。管取一戰定東京。怕甚麼天府金城。早教晉君臣來繫頸。

〔丑〕挾槊彎弓馬上飛。

〔末〕攻城略地運謀機。

〔淨〕早教大將揮神筆。

〔合〕定見降王走傳車。

第十齣 王敦失守

〔番卜算〕〔淨扮王敦上〕禦侮握兵權。衛國居垣翰。羣胡分道寇中原。朝野皆驚

眩。承恩坐鎮洛陽城。奕世勤王國史稱。夜捲牙旗千里雪。朝飛羽騎一河冰。下官都督王敦是也。從兄

王衍。官爲司徒。王澄官爲司徒。世稱三窟。因國內搖動。朝廷勅俺都督中外諸軍。鎮守中原。昨報劉

耀石勒分道南侵。兵勢強盛。河北諸軍。盡皆敗衄。今已渡河。將至城下。天子議欲避兵。未知何如。兵

校你可傳令五城諸將士。堅守城池。不可輕忽。〔丑末〕領鈞旨。〔淨〕准備鞍馬。待我巡警一番。〔巡

介〕

〔紅繡鞋〕強胡劉石呼延。呼延。連兵入寇中原。中原雲雕鐵騎兩紛然。旗蔽日。

鼓喧天。傾上郡。破重關。〔末丑〕皇城守禦惟艱。惟艱。移文急召兵援。兵援。將軍

且請展愁顏。增樓櫓。固城垣。堅甲冑。整旗旛。〔外扮探卒上〕天殃危社稷。烽火及甘泉。告

都督。劉耀石勒攻破宣陽門。天子及六宮妃嬪。盡皆被執。丞相周顛等從數騎突出東門而去。都督

作急點起軍兵。去奪御駕。隨快隨快。〔淨〕天那。這等大事。如何支撐。

〔包子令〕膽喪魂驚。心憤亂。心憤亂。裂冠毀冕。困腥羶。困腥羶。乘輿覆轍。遭天

謹。思量臣子有餘愆。有餘愆。〔合〕須戮力轉日回天。轉日回天。〔丑末〕正氣掃地。

山河變。山河變。君讎誓不共戴天。共戴天。裹瘡泣血還百戰。三軍怎敢暫偷安。

〔合前淨〕衆將士。你可各牽輕騎問道。啣枚疾速。邀截石勒劉耀那厮歸路。努力奪回聖駕。六宮后

妃公主。賞以萬金。爵以萬戶。〔末丑傳令介衆〕告都督。衆將士皆膽戰心驚。無人敢去。〔淨〕既如此。

京城已失。敵鋒方銳。不免收拾敗殘軍馬。奔到江東去罷。

漁陽烽火照函關。玉輦匆匆下北山。

百二山河成破碎。蒙塵天子幾時還。

第十一齣 慶賞

〔錦堂春〕〔生上〕風暖鶯聲巧。雨餘階下苔斑。荼蘼架上紅方綻。正值豔陽

天。〔旦上〕紅杏枝頭春鬧。珠簾曙影斜穿。惜花祇恐花飛片。隔竹怯啼鶯。〔生〕

〔蝶戀花〕無情日月雙丸跳。轉眼韶光。又是清明候。春照水波明已透。芳郊常恐花枝瘦。〔旦〕人世

難逢開口笑。問柳尋花。好景休辜負。鳳瑟鸞笙時合奏。對花正值人年少。〔生〕娘子。你看春滿郊原。

萬花如錦。可備筵席。請岳母母親同到南園觀賞。以敘天倫之樂。多少是好。〔旦〕筵席俱齊備了。
〔生〕既如此。請二母出來。〔老旦上〕

〔清平樂〕流光似箭。鏡裏容顏換。又報南園春過半。浮世眞如夢幻。〔貼旦上〕剪
翦風生繡幙。微微雨過欄杆。且共看花梓澤。何須去訪桃源。〔老旦〕春院慳慳睡起
遲。三竿紅日上朱扉。〔貼〕重門深鎖無人到。惟有呢喃雙燕飛。〔老旦〕親母孩兒既蒙招贅。老身又
辱駢儂。華居厚膳。何以克當。〔貼〕骨肉至親。何分彼此。賢婿請我二人出來。有何話說。〔生〕告岳母
母親。天地爲萬物之逆旅。光陰乃百代之過客。浮生若夢。爲歡幾何。當此和煦天氣。品物咸亨。安排
蔬酌。同到南園賞花觴詠。以樂天年。〔貼老旦〕佳景難逢。青春不再。既有此舉。甚合兩心。便可攜觴
同往。行介。〔合〕此間就是南園了。〔合〕只見萬種奇葩呈豔麗。十分春色在枝頭。好景物也呵。將酒過
來。〔生〕

〔錦堂月〕麗日江山。春風花草。繁華幾經過眼。九十風光。回首又逾強半。嘆浮
生忙裏推遷。憐暮景暗中頻換。〔合〕金樽滿。聽取花下笙歌。捧觴酬勸。〔旦〕堪觀。

橋梓陰連。萱花秀毓。交加雨露鮮妍。桂蕊蘭香。韶華佔斷名園。連理樹並蒂交枝。比翼鳥雙棲同綰。〔合前老旦〕凭欄。琴瑟調絃。斑斕戲彩。花前擲舞。踟躕。拾翠尋芳。脚盃且自消遣。孩兒。休長恁林壑投閒。須早把桑弧射遠。〔合前貼〕開簾。九棘森然。三槐掩映。羹牆禮樂相傳。更冰玉生輝。門楣堦館多賢。閒庭畔遲日暄長。塵夢裏餘光影短。〔合前生〕

〔醉翁子〕堪戀。國色與天香綴滿。〔摘花與旦插介〕須摘取花枝。滿頭插遍。〔旦〕欣忭。向金谷叢中。對酒高歌同繾綣。〔合〕歌聖善。願壽考無疆。永保團圓。〔老旦〕甞勉。看我兒材器如瑚璉。你須奮翮鵬程。策名金殿。〔貼〕囊贊。看時事多艱。怎忍懷寶迷邦袖手看。〔合前貼老旦〕

〔僥僥令〕鳳簫聲漸緩。柘袖舞初闌。〔生旦〕不覺楊柳樓心歌殘照。扇底落東風盡醉酣。〔貼老旦〕獸爐銷玉篆。綺席徹犀錢。〔生旦〕只見鞦韆影落欄杆晚。飛蓋與游韁尙纜牽。

〔餘文〕歡歌永日猶嫌短。傍花隨柳過前川。偷得浮生半日閒。

人生七十古來稀。

日向花前盡醉歸。

傳語東風共流轉。

暫時相賞莫相違。

第十二齣 新亭流涕

〔未扮院子上〕廟堂無策可平戎。坐使甘泉照夕烽。寶鼎銅駝荆棘裏。龍樓鳳閣黍離中。小人乃王都督手下的便是。前日隨都督鎮守中原。兵敗奔來江左。痛想國家被兵之時。真個好慘傷也呵。只見那蜂蟻成屯。豺狼載道。鳥飛不下。獸挺亡羣。風烈兮日曛。山崩兮水沸。利鏃穿腸。血滿長城之窟。驚沙撲面。屍填巨港之涯。數代衣冠。淪於左衽。兩朝豪傑。沒入古丘。曠日空殘壘。塙傷滿目荆榛。夜月迴頽垣。忍見高卑陵谷。二帝塵蒙。洛邑江山千里暗。百僚鼠竄。咸陽宮殿三月紅。發掘諸阜陽。收暴骨。焚燒九太廟。盡化飛灰。失耕隴畝。鞠爲麋鹿之場。無主寢園。遍是莓苔之境。真個世運厄陽九。干戈禍生靈。好苦呵。何時一掃胡塵靜。太平重見漢官儀。今日都督分付整頓筵席於新亭。請王司徒周司徒劉太尉三位老爺飲宴。商榷朝政。筵席已完。都督早上。〔淨扮王敦上〕

〔出隊子〕神京捍禦。推轂承恩。總六師。背城百戰。苦難支。竭力輸忠心。無二一。點丹衷。神人鑒知。九重城闕迴烟塵。回首中原嘆陸沈。自願勤王會百戰。捐軀空自建奇勳。王敦捍禦京國。晝夜血戰。出萬死。得一生。奈何孤旅難支。遂致失守。及帝后播遷。急欲遣騎。邀回聖駕。只因士卒破膽。不能用命。以故無成。若論我今日。擁衆來奔新朝。當有不次之待。反聽劉隗刁協之徒。竊弄威柄。將我補天浴日之功。棄而不錄。思之不能無怨也。罷罷。此是國家正當危急之際。不宜自立異同。姑且勉力匡扶。待關河平定。別議之耳。左右的。酒席完備了未〔末〕完備了〔淨〕請各位老爺出來〔末下外扮王導上〕

〔滿庭芳〕國步艱難。憂如天墜。誰爲王家死綏。〔小外扮劉琨上〕戎馬在郊。羽書日夜交馳。〔末扮周顛上〕太阿柄倒持。南冠無奈北風吹。〔合〕堪悲處。舊京何在。人民城郭都非。〔見介外〕列位大人。夷狄亂華。宗國傾覆。吾等食人之食。不能死人之事。寧無愧於心乎。〔小外〕自古道主憂臣辱。主辱臣死。若論二帝受此困頓。吾儕分當捐軀赴難。以全忠節。但恐自喪溝瀆。無益於時。故且忍恥偷生。以圖恢復。列位大人。我與你須當盡心竭力。期復大讎。不可苟

安歲月。坐失事機。〔淨〕只一件。方今劉石盛強。難與爲敵。只宜畫江固守。以保宗社。況江東幅員數千里。借使無失。黃河以南。猶可作龜茲國。何憂之有。將酒過來。〔外〕

〔江頭金桂〕此時何時。敢就盃酒。自羯虜窺覷神器。胡塵四塞迷。頃刻把中原板蕩。冠履倒置。黎民無子遺。只恨我生不逢時。淪胥顛沛。況我備員樞軸。休戚攸關。焦思苦心。當自勵。敢素餐尸位。素餐尸位。須鞠躬盡瘁。是何時。從頭收拾山河舊。天外重將落日揮。〔末〕仰見二辰失位。神京九鼎移。自從虜馬飲江。滄桑遷變。指顧

江山。漫非舊日之景。可傷可傷。攜手憑高睇盼。風景不殊。舉目有江河之異。〔流汨介外〕呀。周大人。你得悲傷。我與你當共戮力王室。克復神州。何至作楚囚對泣乎。〔末〕猛然間覩

物興悲。早不覺潛然流涕。列位大人。我自願漆身吞炭。嘗膽臥薪。同心協力。期雪恥。須歃血爲誓。歃血爲誓。〔歃血介〕冰霜堅志。強維持。還將破碎乾坤整。沙漠重迎二聖歸。〔小外〕那日把金甌輕毀。周京遍黍離。回首故都何處。親舍千里。白雲遙指在天際。〔外〕劉大人。自古爲國者不顧家。今天子安在。敢言親乎。〔小外〕列位大人說得

是只爲王室凌夷。不遑戀桑梓。那日二帝北狩之時呵。追想牛車北去。俛首羌氏。攀轅滿城空淚垂。人生值此大難。何用生爲。恨不得見危授命。見危授命。殺身全義。自思之。還須射卻天狼落。會見漁陽無鼓聲。〔淨〕想那日王師失利。金湯瓦解。危忍見生靈百萬。肝腦塗地。教我奮身空捍禦。怎當得虜勢滔天。三軍奪氣。直似泰山壓卵。膂力難持。倒戈望風空潰圍。爲今日之計呵。且畫江固守。畫江固守。暫作偏安之計。自遲疑。吾曹縱有擎天手。只恐大廈終非一木支。〔小外末〕都督

此計左矣。我晉朝非在上者無道。良由宗室爭權。自相魚肉。遂使犬戎乘隙。毒流中土。今遺民思奮。若能命將出師。遠近豪傑。必望風響應。何故區區作自守虜乎。〔外〕二位大人言之極當。〔小外〕又一件。二帝在北。不宜忽然。須當時復遣問起居。以盡臣子之義。〔小外〕

〔憶多嬌〕國破裂。君難急。青衣之恥猶未雪。逋臣此恨何時竭。〔合〕壯懷激烈。甘爲愁侍中血。〔末〕天柱折。地維缺。一江南北乾坤別。遙看朔漠心如噎。〔合前〕
〔鬪黑麻〕〔外〕只願江左羣寮。心孚契結。狗國忘家。忠肝似鐵。收疆土。恢帝業。

麟閣圖形。燕然勒碣。〔合〕寸心迫切。衷腸似火煎。聽取江流聲如哽咽。〔淨〕若論我文武才猷。爲時俊傑。兄弟桓桓。世稱三窟。朝廷若能用我。我扶宗社。驅胡羯。再造乾坤。重援覆轍。〔合前外〕劉大人。下官昨日舉保祖士雅爲元帥。足下爲副帥。與兵北伐。銅符已下。刻日請行。〔小外〕既有詔命。下官就與祖公同行便了。

〔淨〕鼎湖龍去洛城崩。

〔末〕擾擾乾坤幾戰爭。

〔外〕獨使至尊憂社稷。

〔小外〕諸君何以答昇平。

第十三齣 聞雞起舞

〔夜游朝〕〔外扮祖逖上〕悵望中原成慨嘆。何忍見生靈塗炭。生世不辰。遭時多難。何日裏掃清帝輦。虜寇日騷動。干戈卒未休。中州王氣盡。江漢水聲愁。泣血瞻河洛。臨危駐石頭。云何舒國難。徹底副君憂。祖逖。表字士雅。范陽人也。少負奇才。素有大志。爲長安傾覆。率部曲渡江。上書自陳恢復之策。蒙聖恩擢居元帥。征西大將軍。鎮守雍丘。着劉太尉參贊機務。近因新朝荐遭離亂。物力疲弊。不給兵屢鎧杖。使我自往召募。卽今內無資糧。外乏救援。單弱如此。大事何由克

濟。會記古人有一旅中興。三戶創業者。兵家運用之妙。存乎其人。豈衆寡強弱之足計哉。此行但當以忠烈感激將士。使知順逆。庶幾義聲昭彰。理直氣壯。師出有名。大功可就矣。今日銅符已下。命駕有期。已遣人去請劉太尉到此。秉燭夜談。怎的還未來。軍校伺候着。〔小外上〕玉帳承恩叨帝眷。參幃幄出鎮雄藩。兵甲胸中。指揮羽扇。管教青海無傳箭。通籍金鑾爲輔弼。坐籌玉壘寄干城。自家蒙聖恩除爲副帥。領兵北伐。如今往參元帥。以定出師之期。〔見介外〕昨日新亭。有何高論。〔小外〕諸公無非忠義。都督王敦。非惟不能爲國分憂。且有悖逆之語。觀其造意。中蓄不臣。竊恐外難未靖。而蕭牆之禍復起。奈何奈何。〔外〕王敦狼目豺聲。終當叛亂。但智識庸下。吾輩若存。足可以制之。何慮之有。〔小外〕元帥言是。請問雍丘之行何日。〔外〕庶事草創。倉卒難行。如今且往淮陰屯田開治。待兵糧備足。器械精利。然后刻期而發。今夜欲與公講論一宵。咨諏請益。〔小外〕元帥坐籌幃幄。決勝千里。必有成謀。但兵貴神速。師出不意。亦一奇也。〔外〕太尉言之有理。

〔刮鼓令〕分符出漢關。駕元戎據玉鞍。磨鈇鉞。奮鷹揚。亟圖報君恩一寸丹。以太尉神武謀略。爲之輔佐。劉石不足平矣。匡輔荷英賢。持危賴君神機妙算。我和你此

去呵。管教三箭定天山。獻俘齊奏凱歌還。〔小外〕元帥。你身當虎豹關。把乾坤早幹旋。奮威武衝鋒冒險。向黃龍繫可汗。下官樗櫟之才。豈足爲元帥副。伴食我應慚。何幸作西樞翊贊。元帥爲須取日返虞淵。播遷天子駕重還。〔小外〕夜已二更。神思困倦。且枕戈少憩片時。〔外〕左右。你去擊柝巡警。我與太尉抵足一宵。〔枕戈睡介丑末同巡更丑介〕老哥。我和你夜夜巡更。風雨四侵。蚊蚋匝體。肚中又飢餓。妻子又宿自。好苦呵。我和你且唱個歌兒耍子何如。

〔五更怨〕深更悄。風雨多。腹餓筋疲怎奈何。幾許銷金共鴛枕。雲雨會。那知漏下有更夫。擊柝歌。〔末〕方纔雨下。如今又有月了。新月掛。曲如鉤。照見窮閭幾處愁。多少紅樓長夜宴。歡娛甚。獨教辛苦執更籌。恨悠悠。〔雞鳴介丑末〕呀。更籌尙未換。怎的雞鳴了。〔外醒蹴小外足介〕太尉。午夜未央。巽風未動。卽聞此聲。豈非惡聲耶。可怪可怪。〔小外〕下官方在朦朧。聞之以覺。此乃乾坤倒置。萬物失序之象也。可嘆可嘆。〔外〕

〔刮鼓令〕荒雞午夜傳。忽驚回客夢殘。爲只爲乾坤顛躓。蹇蹇孤臣睡怎安。我

終夕思茫然。攬衣起。徬徨待日。〔舞介〕欲待要仗劍斬樓蘭。燕然勒石紀功還。

〔小外〕邊烽晝夜傳。苦遭逢國步艱。怎能較輿圖清晏。漢官儀何日看。王都督。

這等奸佞之徒呵。空自戴蟬冠。叨竊君恩。當知愧赧。此行瀝酒爲誓。若不稽顙至呼。

韓。玉關此去不生還。〔外〕太尉。淮漢乃洛陽咽喉。欲得中原。必先取河北。公當速將一旅之師。

先去按視地形。便宜行事。下官隨常繼發。〔小外〕領命卽行。元帥。世方多故。如欲戡亂經邦。非賢才

不可。下官有妹夫溫嶠。故河東郡守溫瞻之子也。文武兼資。管肅之亞。敢薦爲幕賓。何如。〔外〕既有

良弼。明日卽當保舉爲總兵司馬。賚詔徵聘。

〔外〕枕戈不寐覺淒涼。

〔小外〕中夜聞雞起欲狂。

〔外〕欲使呼韓來稽顙。

〔合〕須教諸葛起南陽。

第十四齣 石勒稱王

〔西地錦〕〔淨扮石勒上〕一旅奮揚邊地。千載開創洪基。英雄自合居天位。功德

可配唐虞。黻冕端居九五尊。應天御世開乾坤。九金神鼎初歸我。五玉諸侯盡在門。寡人自收中州

之後。王師到處。無不歸降。近從羣臣之請。立居天王之位。國號大趙。建都洛陽。昨聞劉曜竊據關陝。亦自稱王。如此僭妄。誠匹夫之勇。井底之蛙耳。俟彼數年。吾當問其鼎矣。又聞司馬睿卽位建康。內有周顛王導輔弼之臣。外有祖逖劉琨熊虎之將。此亦勍敵。不可蔑視。不免召謀主張賓。勇將石生

石虎。定議則個。〔外扮張賓上〕

〔前腔〕決勝廟謨雄斷。料敵方寸神機。〔丑扮石虎石生同上〕倚天長劍泣蛟螭。那

怕金壘湯池。我王萬歲。〔淨〕右侯。我昨披輿地圖。四海如此其廣。何時可一天下乎。〔外〕告大王。

順德者昌。逆德者亡。欲一天下。當順民心。古之王者。在德之厚薄。不在地之大小。〔淨〕卿言極是。我

如今欲破劉曜。計將安出。〔外〕

〔東甌令〕大王聽告。晉家魚肉爰失其鹿。天下英雄相競逐。劉曜呵。雖然掩襲倖

先得。未必民心服。吾王威武華夷屬。一怒皆懾伏。〔淨〕劉曜兵強地險。恐未易破。〔外〕

劉曜耽嗜麪藥。網紀廢弛。雖據關中。濟得甚事。他是個公孫木偶。修邊幅。大王視彼眞

如几上肉。若令大衆臨函谷。勢應如破竹。管教他輿櫬口銜玉。稽顙作臣僕。

〔淨〕劉曜若擒江東用何術以破之。〔外〕江東帶甲百萬。江漢爲池。君臣輯睦。恐未易破。江東雖小承正朔。終作二分爲鼎足。況兼天塹限南北。盤基恐難覆。大王若要圖之。只須送出三軍。蠶食吳和蜀。〔淨〕軍師智勇勝頗牧。廟算皇猷常啓沃。我推赤心置人腹。遣將自推轂。石生石虎。你須努力收疆服。酬功賚天祿。石生石虎。你二人武勇高天下。今日在我跟前。把行陣的本事。各逞一番。以觀汝二人將略何如。〔末〕告大王。戰以克敵爲功。凡用兵布陣。須要自度權衡。敵爲火陣。以水制火。彼必敗矣。敵爲地陣。以天陣。以天臨地。我必勝矣。生地則出魚麗之陣。死地則出雲鳥之陣。衢地則用八卦之陣。圍地則用六花之陣。增竈滅竈。方略不同。囊沙量沙。動靜莫測。孫子曰。兵未戰而妙算勝者。得算多也。將通於九變之利者。知用兵也。〔淨〕好智略。石生說。〔丑〕告大王。兵以敢死爲勇。凡用將對敵。必須先作勇氣。則寡可勝衆。弱可制強。七縱七擒。能破魏貅百萬。八戰八克。那怕虎賁三千。蜀劍閣只消空拳打開。函谷關擬把靴尖踢倒。挾太山而超海。只作尋常。舉九鼎而拔山。豈足爲異。擒了司馬劉曜回來。方顯功業。英雄蓋世。〔淨〕好勇略。你二人果然勇足以當鋒。智足以取勝。滅晉除劉。易如反掌。右侯。我就拜你爲

軍師石生石虎爲大將。一同提兵前去。先定關陝。後取江東。務要協力同心。建功立業。不可有違。

〔衆〕領旨。

〔金錢花〕披堅執銳離營。離營。貔貅彪虎雲從。雲從。管教一戰陝城空。擒劉曜。定關中。〔合〕傳露布。返元戎。返元戎。〔衆〕喧天鞞鼓聲雄。聲雄。師行誰敢當鋒。當鋒。一枝長戟六鈞弓。摧函谷。定江東。〔合前〕身馳鐵騎臂彤弓。出塞將軍玉帳雄。九姓羌胡隨制節。六州部落互相攻。〔衆下淨弔場〕大軍啓行。萬機稍暇。不免宣出二姬。玩賞一番。多少是好。

內史請二位夫人出來。〔旦老旦上〕

〔金瓏瓏〕承恩居未央。羅衣染惹天香。攜柘袖。諳宮商。綸音方召幸。忙整金釵。雙鳳凰。趨殿陞侍君王。我王萬歲。〔淨〕二妃。我連日留心軍旅。失了掖庭之樂。今當人閒晝永。薰風入絃。召你二位出來。翫賞片時。以消炎暑。〔旦老旦〕

〔山花子〕珠簾高捲金鈎控。御爐香噴烟濃。烈炎威不到九重。南薰樂沸絲桐。〔合遞酒介〕瀉瓊霞光浮碧筒。六宮粉黛擊玉鍾。百寮濟濟待袞龍。萬歲嵩呼。

共祝華封〔淨〕深宮悄似朱明洞。玉壺冰簟生風。見祥雲瑞氣鬱葱。火龍任自騰空。〔合前旦老旦〕妾身幸遇宸恩寵。昭陽殿裏從容。喜羊車時過後宮。御溝何用題紅。〔合前淨〕宵衣旰食身端拱。傾心延攬英雄。念征人衝冒鏑鋒。何時奏捷膚功。〔合前〕

〔舞霓裳〕〔旦老旦〕謾束湘裙舞回風。回風樂譜新腔喜溢重瞳。重瞳。吾王聖德威聲重。萬國遍朝宗。於變時雍。〔合〕齊看取華夷一統。河清晏。航海梯山盡修貢。〔淨〕曉入瑤臺遇飛瓊。飛瓊。緩步金蓮環珮玲瓏。玲瓏。歌聲響遏行雲迴。明月上簾櫳。沈醉還宮。〔合前旦老旦〕更闌人醉。大王請進椒房。

〔淨〕銅壺銀箭漏聲催。

〔旦〕飛燕昭陽待宴回。

〔老旦〕珠翠兩行齊侍駕。

〔合〕羊車輓入後宮來。

第十五齣 詔聘太真

〔一剪梅〕〔生上〕槐棘陰濃翠滿庭。簾捲風清。爐薰香清。掩書俯几憶平生。刻

鵠初成。畫虎還成。〔浣溪沙〕年少英雄七尺軀。學書學劍欲何如。至今滄海尚遺珠。心驚萱室

時偏短。暗想中原勢已危。避兵何地可安居。俺晉朝自從宗室相殘。五胡分擾。神州陸沈。瑯琊南渡。溫嶠身雖草莽。志存恢復。爭奈高堂母老。幽室妻單。喜懼交戰于心。出處未致其決。正是欲伸赤手扶紅日。恐斷青眸望白雲。

〔懶畫眉〕中原戎馬亂縱橫。每見妖星氣不平。平生有志復神京。須教挽卻天潢水。洗淨山河戰血腥。

〔又〕欲揮神劍斬長鯨。擬絕天驕拔漢旌。只因日暮念蒼庭。孤雲恐切河陽望。且韜迹辭榮暫隱名。〔外扮使臣賚詔并冠服上〕

〔六么令〕一函綸命。雨露霑濡。日月明。爭看莘野起阿衡。佐聖主寄干城。〔合〕行看四海樂昇平。聖旨已到。新官冠服迎接。〔生穿衣跪介外讀詔介〕皇帝詔曰。朕惟天位惟艱。

必賢才斯可輔理。邦家多難。非俊髦孰與經綸。我祖宗纘禹舊服。奄有華夏。傳世五君。代無失德。茲因骨肉乖離。以致羌胡雲擾。宗社失守。大帝北轅。朕自渡江已來。苦心焦思。不遑寧處。今欲招來天

下豪傑。尅日北征。期於洩忿殲胡。重援溺輶。前者鎮西大將軍祖逖奏稱。太原溫嶠。才兼文武。學貫天人。實有禦侮之才。堪作腹心之將。朕准奏。宣麻封爾爲總兵司馬。赴鎮聽調。爾當體朕宵旰求賢之誠。分猷報主是力。勤勞夙夜。匡國救民。倘俾大難得復。王業中興。朕當分茅錫土。崇德報功。欽哉。持命望闕謝恩。〔山呼介外〕溫大人。邊境告急。便可就道。弗可愆期。〔生〕朝廷恩命。不敢有違。卽當辭別母妻。起程便了。

〔外〕羨君談笑出風塵。

〔生〕叨受兵符寵渥新。

〔末〕鵬鸞九霄初奮翮。

〔合〕行看功業畫麒麟。

第十六齣 絕裾辭母

〔謁金門〕〔旦上〕空留戀。指日河橋人遠。漫把鴛鴦輕拆散。從今添個思君怨。
〔生上〕堪嘆青錢入選。名利牽人一線。〔合〕母子夫妻情分淺。兩意難排遣。

〔旦〕相公。君命召。固當不俟駕而行。親年老。豈可便違顏而去。〔生〕夫人。親恩固所當盡。君義亦不可違。老母在堂。專望賢妻小心侍奉。卑人若有寸進。便常整飾西還。不敢久戀上國。〔旦〕朝廷既有

詔聘。奴家不敢阻當。不知起程在於何日。〔生〕邊事緊急。就去堂上辭別母親岳母。即便起行。〔老旦上〕

〔臘梅花〕我孩兒應聘赴神京。頃刻天涯形影。〔貼上〕看驂驪方騁。鷓鴣奮迅。

扶搖萬里上雲程。〔生〕母親。子道未能全。王事苦間關。〔老旦〕孩兒窮經須口用。憂國義當先。

〔貼〕賢璫。丈夫四方志。鄉井莫留連。〔旦〕相公。但願功成後。錦衣及早還。〔老旦〕孩兒。朝命既促。登

程須早。〔生〕母親。孩兒本欲困守窮閭。供爲子職。只爲羽書逼遣。無可奈何。今日只得促裝前去。母

親。岳母。善保尊體。切勿掛懷。

〔園林好〕離膝下。游子違親事遠征。離膝下。脂車啓行。只慮着桑榆暮景。〔合〕

衷曲裏結愁城。〔旦〕君今去。冷落了金釵繡屏。君今去。心懸旆旌。只怨我紅顏

薄命。〔合前老旦〕

〔江兒水〕你仗劍丹心壯。我衰顏兩鬢星。臨行怎禁得離愁耿。兒。你駕着星車

長塗騁。我倚門空覓孤鴻影。孩兒此去呵。你好把長纓奏請。〔合〕早願功成。衣錦

歸來重歡慶。〔貼〕賢婿。你立身期遠大。報國任縱橫。濟時早把國鈞秉。賢婿我孩兒見統兵在河北。見時千萬教他戮力王室。切勿以老身爲念。論事親雖合全孝行。許國尤當據忠盡。〔生悲介〕賢婿。大丈夫當立功異域。何必顧戀鄉閭。豈可藏居鄉井。〔合前旦〕

〔五供養〕叨陪妾媵。中饋饗飧。自合應承。夫我只愁關山和峻嶺。陟險冒炎蒸。未卜狼烟甚日平。嘆別離在俄頃。執手慇懃問。何日是歸程。〔合〕別淚盈盈。憂心炳炳。〔生〕賢妻啓聽。我須不是浪裏浮萍。肯飄飄流異境。忘卻屢屢情。母親。岳母。非我違顏干利名。只因難拒皇朝的三聘。妻。白髮堂前母。望你代溫清。〔合前末〕

丑扮軍士執旗上

〔不是路〕按劍登程。軍士紛紛郊外迎。兵車整。羽書催趲不留停。授專征。朝廷欽限休違悞。告請將軍早啓行。小人奉祖元帥嚴命。請司馬老爺赴任。交傳命。道中原豺虎紛歧徑。仗君綏定。〔生老旦〕聞罷傷情。唱徹驪歌不忍聽。〔旦〕心悲哽。牽衣把臂淚如傾。形和影。從今兩地傷孤另。愁迢輕塵向渭城。〔生〕還思省。慈幃遠

隔斑衣冷。旅愁千頃。軍士。你可去河邊等候。待我告別老夫人就來了。〔末丑〕領鈞旨。正是戰
士離家心獨苦。將軍赴鎮勢偏雄。〔下生〕母親有何指教。〔老旦〕孩兒近前來。我分付你。

〔玉交枝〕運籌決勝。料吾兒韜略素精。臨戎敵愾宜奮勇。恩威賞罰須明。功名
及早辭寵榮。高堂風燭渾不定。〔合〕莫教人門閭獨凭。〔生〕萱庭嚴命。孩兒自當
服膺。此行須展平生志。決不敢曠職徒行。此去呵。中原板蕩如已寧。陳情辭祿
還歸省。〔合前旦〕

〔川撥棹〕夫。你囊錐如脫穎。把歸鞭須早整。休要戀着鐘鼎蟬纓。鐘鼎蟬纓。忘
卻我裙釵布荆。君當牢記玉鏡之盟。毋使妾有白頭之嘆。須記取結髮盟。莫教羞白頭。

愁破鏡。〔生〕妻。與你糟糠盟訂。念這宋弘敢負情。〔出鏡介〕單人若忘前情。有如此鏡。便
把這菱花爲證。菱花爲證。偕老深盟誓不更。我生平非薄倖。勸娘行莫掛縈。母

親。岳母。此間就是河邊了。就此告別。〔老旦〕孩兒爲官雖是好事。只是母子之情。一時間舍不得你
就去。你六月棲棲冒暑行。我的心中渾似冰。只怕你留滯邊城。留滯邊城。朝

夕使我望眼睜。況我窮年值暮齡。遠游人當自傲。〔生泣拜介〕兒非爲忠名遺孝經。非不念慈親在疚惓。但只願顯親揚名。顯親揚名。我故奉檄違顏。敢受徵。
孩兒登舟去罷。〔老旦〕孩兒且慢。你去端的幾時回來。〔生〕母親在堂。豈敢久游。料不久還具慶。別吾慈策步登。〔生下絕裾介老旦泣介〕呀。衣裾斷了。逆子。你這等去得忙。〔旦泣介〕夫你徑不回頭就去了呵。〔貼〕親母。他也只爲王事要緊。不要怪他。且自耐煩回去罷。

〔餘文〕愁感感。淚盈盈。可憐骨肉兩漂零。江山咫尺分吳越。腸斷關河信杳冥。
〔老旦〕堪憐絕裾便登舟。
〔貼〕王事多艱不自由。

〔旦〕心折此時無一寸。

〔合〕滿腔離恨逐西州。

第十七齣 赴官

〔望遠行〕〔生上〕欽承恩詔。驛騎忙馳驟。〔外扮戴漚上〕碧落初開。殘蟾猶照。忽聽前林呀。喔雞聲頻報。〔未丑〕盼星繩何日轅門得到。〔見介生〕〔踏莎行〕獵狃侵陵。王師薄伐。勤王六月征車發。思親回首戀家山。愛君極目瞻天闕。〔外〕金谷榛蕪。乾坤幅裂。塵埃滿目人

情別。風雲入陣。寒烟清。收功直擬窮狼穴。〔生〕大人何往。〔外〕下官戴淵。亦爲奉詔勤王。〔生〕既如此。卽當聯旆同行。戴大人。溫嶠昨承詔命。卽便戎服登舟。臨岐之際。母親扯住衣服。自家匆促別時。不覺裾絕。今日細思想。此情如何過得。〔外〕溫大人。始於事親。終於事君。公義私恩。豈能兼盡。聞尊堂太君年齡未衰。足下畢了王事。回來奉養。未爲晚也。〔生〕大人說得是。如今天色漸明。謹行幾步。

〔生〕

〔甘州歌〕我心懷國憤。奉勤王詔命。遠赴轅門。胸中蘊藉。盡是兵甲經綸。披星戴月。馳邊塞。執銳披堅。掃虜塵。〔合〕驅驃騎。驟虎賁。征車日夜不停輪。雲烟渺。岐路分。江潭何處是通津。〔外〕祝融烈火雲。見扶桑旭日。擁出金盆。征衣汗透。空思解慍南薰。關山渺渺。愁遠道。烽火年年報虜塵。〔合〕雙龍逝。五馬奔。長蛇封豕。峭戍羣。囊沙地。聚米屯。風聲鶴唳不堪聞。〔生〕平生許國身。念登舟絕裾。母子輕分。赤心一點。恆自憂國憂民。〔外〕六飛杳杳歸何處。兆庶紛紛困虜塵。〔合〕胡風兢國步屯。漢家陵寢遍荆榛。乾坤沸。玉石焚。荒涼銅雀鎖愁雲。〔末〕

荆樊嘆陸沈。看舳艫煨燼。橫槩誰吟。松杉遠近。何處是天闕神京。〔丑〕指揮白羽驅胡騎。直向黃龍靖虜塵。〔合〕烟郊暮隴日曛。餘烽野燒暗驚魂。丹心壯劍氣橫。何時傳檄定三秦。

〔餘文〕秉旌旄臨戰陣。郵亭此夜暫停驂。報國縱橫七尺身。

〔生〕劉項持兵鹿未窮。

〔外〕路邊戈甲正重重。

〔末〕將軍奮力勤王事。

〔合〕奪取龍驤第一功。

第十八齣 母妻思憶

〔憶秦娥〕〔老旦〕長悲嘆。天涯游子音塵斷。倚門慈母。淚痕如線。〔旦上〕春山

懶掃香雲亂。起來謾把珠簾捲。空階墜葉。晚風吹散。〔老旦〕〔玉樓春〕夜來風雨人傷

別。淒淒四壁聞蛩咽。夢破五更心欲折。笛聲吹落梧桐月。〔旦〕碧空杳杳雲山疊。秋波望斷雙魚絕。

美人遙憶隔湘江。一寸柔腸千縷結。〔老旦〕媳婦。自從孩兒去後。雙鬢垂白。百慮成灰。追想前日絕

裾之事。養子也是徒然。〔旦〕婆婆。王事靡盬。不遑將母。丈夫那日也只是急於王事。故有此愆。〔老

旦忘家狗國。理固當然。只是我一時放心不下。旦丈夫功名成就。必然辭祿歸田。婆婆不必掛念。老旦孩兒去後。又是二月。途路風霜。山川阻隔。令人朝夕倚闥懸望。好愁悶也呵。

〔傍妝臺〕愁倚畫欄中。中原極目。遙隔萬山重。嘆胡虜方騷動。怎得個信音通。兒。你親老家貧期祿養。早建班生萬里功。〔合〕事親盡孝。事君盡忠。休教虛負學三冬。〔旦〕彩雲天遠鳳樓空。幾多幽怨。堆積在心胸。愁蹙損雙眉黛。泪溼透兩綃紅。何時細柳休兵甲。早使扶桑得掛弓。〔合前老旦〕

〔下山虎〕去時南陸。忽轉西風。懊恨征車發。離緒一縷兒。你要把乾坤旋轉。致令母子西東。往事空嗟類轉蓬。韶光看瞬息。金井驚飛一葉桐。清夜勞魂夢。愁感倍濃。尺帛何由倩便鴻。〔旦〕夫。你櫛風沐雨。冒鏑衝鋒。汗馬沙場上。白日貫虹。怎能覈天驕授首。早使稱奏膚功。獻捷歸朝萬戶封。竊祿承天寵。夫。只怕你忘卻糟糠嗜鼎鐘。苦我這裏釵折羞雙鳳。縱有膏沐呵。誰適爲容。腸斷巫山十二峯。〔餘文〕堪嗟聚散如春夢。無情流水自溶溶。載不得萬恨千愁到海東。

〔老旦〕入夜西風枕簟秋。

〔旦〕感時傷別思悠悠。

〔老旦〕倚門望斷無消息。

〔合〕一曲欄杆一曲愁。

第十九齣 渡江擊楫

〔夜游朝〕〔外扮祖元帥上〕職掌元戎居台輔。秉金符宸闕恩崇。北門鎖鑰中流砥柱。擬作皇家霖雨。淮海藩維一老臣。兵符三授荷君恩。指揮軍事回天地。訓練強兵動鬼神。

祖遜自鎮守雍丘已來。且喜士卒調和。華夷宣化。後趙鎮戍相繼率部曲來降。第恨大雉未報。中原未復。難共戴天。前者劉太尉舉薦妹夫溫嶠。朝廷下詔徵爲司馬。聞此子文武備足。有牧民禦衆之才。劉越石真能達衆舉親。溫太真可謂不負所舉矣。俺如今要收河北。已遣越石先行。只等司馬來到。拔寨起程。兵校溫爺怎生不見來到。伺候着。〔丑末〕啐。〔生上〕

〔番卜算〕擁衆挾彤弓。戮力驅胡虜。腰橫長劍氣冲霄。期雪永嘉恥。溫嶠蒙聖恩。除授總兵司馬。督府參軍。這里正是元帥帳下。兵校每通報着。〔相見介外〕劉越石數言足下智勇才略。超今邁古。今幸得拜下風。請教行師之道何如。〔生〕告元帥。行師之道。以節制仁義爲先。攻擊

不足以當節制。節制不足以當仁義。務要先明分數。使兵識將意。將識士情。有不戰。戰必勝矣。〔外〕
請教臨陣之法何如。〔生〕兵以能知虛實。識地形爲上。先處戰地而待敵者逸。後處戰地而趨戰者
勞。故善戰者。逸能勞之。安能動之。出其所不趨。趨其所不意。攻其所不守。守其所不攻。臨陣之法。無
過於此。〔外〕高論高論。俺雍丘南有劉曜。北有石勒。二虜聲勢甚振。將何計以破之。〔生〕劉曜石勒。
外雖相親。內實相妬。元帥要除此二豎。須先遣辯士說使乖離。俾自爲攻戰。元帥徐與問罪之師。塞
住喉咽。絕其糧運。以收漁人之功。此所謂用夷攻夷之術也。〔外〕足下妙算。正合吾意。就此拔寨渡
江便了。〔外〕

〔四邊靜〕〔渡介〕司馬只因先皇不聽禦戎之論。故有今日。羌氏種落居京城。冠裳累胡
族。狼虎入庭除。神州遂沈陸。〔合〕皇庭失鹿。華夷競逐。我和你報主盡忠丹。捐
軀誓恢復。〔生〕想我朝之禍呵。內庭蹀血相魚肉。外夷肆狼毒。元帥經略藉雄才。中
興可先卜。〔合前外〕金符分闡承推轂。孤臣志彌篤。溫司馬。祖逖今日擊楫爲誓。若不清
中原而復濟者。有如此江。與你擊楫渡中流。誓收舊疆服。〔合〕調和玉燭。維持鈞

軸若不復中原。空教竊君祿。〔丑末〕旌帆千里揮艦舳。操戈舞雙纛。奮勇敢爭

先。兵機貴神速。〔合前〕告老爺。風順帆速。舟行如飛。瞬息之間。已抵北岸。〔外〕迅利如此。助若有

神。足見佳兆矣。〔生〕軍士暫且上岸屯營。明日議圖進取。〔外〕江陽空闊。謹防斥堠。〔丑末〕領鈞旨。

〔福馬郎〕大帥桓桓嚴部曲。背水屯營。沿江設伏。怎禁得霜征并露宿。〔合〕你

看狐兔遍陵谷。桑田滄海盡翻覆。〔丑〕策馬彎弓持利鏃。泣血裹瘡曾無懼。你

幸喜中原今有頗牧。〔合前外〕已遣劉越石取淮北。今司馬進兵淮西。二將夾攻。以逼中原。

〔外〕決勝今朝共運籌。

〔生〕安危須仗兩分憂。

〔丑〕分明會得將軍意。

〔末〕不斬樓蘭誓不休。

第二十齣 郭璞仙術

〔未扮郭璞上〕羅浮道士誰同流。草衣木食輕王侯。世間甲子管不得。壺裏乾坤只自由。郭璞表字

景純。河東安喜人也。幼習經文。書窮堯典舜典。長通卜筮。學究先天後天。參透聖域賢關。洞達天根

月窟。師郭公而得青囊。真個五行藏智府。暮長房以語縮地。果然千里在目前。一粒粟中藏着三千

世界半瓢水裏包涵萬里山河。推禍福。定吉凶。因此識彼。決興亡。測窮達。卽始見終。鬼谷孫臏何足算也。君平左慈吾豈讓焉。賣卜至長安。莫解吾曹祕術。觀光來上國。誰知瓢裏仙丹。正是三醉岳陽人不識。朗吟飛過洞庭湖。徒弟趙戴過來。〔丑〕師父有何分付。〔末〕徒弟。我作仰觀天文。俯察地理。見七馬負圖。中土合遭板蕩。一龍跨海。江東定見中興。將星芒赤。主大將有災。天鼠鬣明。必強臣內叛。今祖士雅握兵在外。王處重專權於內。天之所兆。其在此二人矣。又知溫太真明日與兵渡淮。牛渚磯中水族多怪。恐有覆舟之患。我和你齊帶通天犀角。往軍前教他燃照。水族自然畏避。舟楫無虞矣。〔丑〕既如此。就請啟行。〔末〕

〔沽美酒〕我御雲軒下碧虛。採嵩山九節蒲。袖拂青飄。駕羽鳧。朝北海。暮蒼梧。入洞府。畫江爲路。跨玄鶴。籠霄捲霧。設香餌。銅盤釣鱸。開寶鼎。丹爐燒兔。火出龍水中。生虎。〔合〕嘯蓬萊。日月長。滄海任教枯。我的容顏長長如故。〔丑〕俺昨日乘風出九達。又飛身渡五湖。縮地潛形入藥壺。歌白鹿。握丹符。掣金蛇。羣魍奔怖。九龍瓢。甘雨時需。五色石。蒼天可補。看世人殘疾鬼軀。怎學得俺長生衡宇。

〔合前〕

青山雲水裏。

此地是吾家。

一瓢藏宇宙。

三尺斬妖邪。

第二十一齣

燃犀

〔淨丑扮水怪上舞介末扮魚頭使者上〕衆水怪聽吾號令。自家奉水母娘娘嚴命。今後如有過河者。俱要豬羊祭賽。若不祭賽。風浪覆舟。不許有違。〔同下生上〕

〔陽關引〕文命拜中郎。溫省分符節。長驅虎隊出江淮。探狼穴。〔淨丑〕虜竈滿荒郊。烽火連三月。是何時。哀笳聲斷邊塵滅。〔生〕嗚嗚塞笛起征鴻。獵獵旌旗颭曉風。千里烽烟愁焰黑。兩淮血戰杆漂紅。心悲鼓角丹心壯。影動龍蛇劍氣雄。擬向圍場盡狐兔。元臣重建貳師功。下官昨承祖元帥嚴命。教我分兵去取淮西。來到此間。就是牛渚磯了。叫兵校艤船等待。就要過淮。〔丑淨〕告將軍。艤纜巨艦。俱已齊備。就請登舟。〔生〕既如此。可傳各哨練兵官部領軍馬上舟。〔淨丑〕領鈞旨。〔末扮郭璞上〕騰空出蓬島。縮地到江淮。郭璞今日爲溫司馬欲渡牛渚磯。特來

燃犀助他。免致傾覆。這里已是軍前。不免進去相見。〔生〕道者何來。高姓大名。〔末〕河東郭璞。就是小生。〔生〕久仰芳名。未獲荆識。今蒙屈駕下顧。必有良謀見示。〔末〕郭璞從游赤松。久謝塵事。見將軍忠誠體國。特來輔導。此間水族多怪。舟行不穩。帶通天犀角。與將軍燃照水底。可使蛟蜃潛形。風平浪息。舟楫無虞。〔生〕此間果有怪物麼。〔末〕怪物委的是有。將軍如或不信。待小生點起犀角。照與你看。〔燃犀介諸怪上舞介衆〕呀。只見奇形異狀。鬼蜮神妖。赤羽緋袍。素車白馬。往來奔竄於水涯。好怕人。若沒有這位真人救護。險些兒被他害了。〔生〕你也說得是。郭先生。如今船可行了。〔末〕且慢着。待小生書一符投入水中。壓他。待諸怪潛蹤滅跡。方可行舟。〔書符投介衆〕呀。好怪好怪。方纔這些妖魔。見真人這靈符。怎生就不見。〔生〕水怪既平。放舟前去。

〔朝元歌〕揚帆海隅。破浪過牛渚。身似憑虛。漂泊隨波遡。你看隊隊旌旄。層層樓櫓。我待把神州撐住。驅石中流。迎還二龍歸鼎湖。跨海淨狼胥。凌波拯溺輿。
〔合〕二軍飛渡。齊要去奮威耀武。〔淨〕幾載臨戎禦侮。驍雄趕趕武夫。鳴劍志伊吾。鬻雪餐風。沈舟破釜。敢辭金革苦。死馘生俘。長鯨短狐皆剪屠。塞北望來

蘇諸番空穴居。〔合前丑〕挾取長戈勁弩。憑河捋虎鬚。踴躍志餐胡。旂炫蛟龍鬪。如虓虎。須效着鷹揚尙父。千里旌旗。長江一望皆舳艫。你看風順帆輕。遡流西下。好

迅利也呵。看蘭槳似輕鳧。濤平如坦途。〔合前末〕辟穀餐霞吸露。生涯一鉢孟。羽化住蓬壺。辭卻蟬纓。棲身豹霧。我特御風軒翥。超海燃犀。湖蛟海靈擲劍誅。

〔生〕先生如今何往。〔末〕我拂袖返天衢。清風吹步虛。〔速下遺簡帖介生〕呀。郭先生怎

麼忽然不見了。〔淨丑〕郭真人騰雲去了。遺下簡帖在此。〔生看介〕元來是西江月一首。此乃仙人

指點之意。〔讀介〕〔西江月〕二帥功聯南服。三夷鋒挫北陲。五原一夜墜南箕。兵甲蕭牆復起。落

幘王臣效義。俘囚烈婦堪悲。樂昌寄遠復完歸。南北旋車重會。細觀此詞。前二句說二帥功聯。三夷

鋒挫者。此必我與越石舅同破張賓石生石虎之驗也。後句不可盡曉。將來必應。留此以爲他日之

驗。軍校。船到岸了未。〔衆〕告老爺。船已傍岸了。〔生〕分付管兵官上岸安營。明日交戰。〔衆〕領鈞旨。

〔生〕牛渚淨妖魔。

〔淨〕清淮異汨羅。

〔丑〕斜陽幸無事。

〔合〕沽酒聽漁歌。

第二十二齣 閨思

〔破齊陣〕〔旦上〕帳冷芙蓉紅滅。被寒翡翠青殘。膏沐慵添。鬢雲撩亂。鏡中羞對孤鸞。夫壻天涯音斷。母氏高堂凋素顏。苦憂愁有萬千。惻惻綠鬢婦。淒淒守深閨。晝永愁成緒。夜關心欲灰。憶昔我夫子。下以玉鏡臺。魚水遂歡合。琴瑟相和諧。一旦東征去。玉匣蒙塵埃。顰眉未翦柳。瘦臉慵妝梅。繡戶網蛛絲。洞房生莓苔。兵戈苦擾攘。衡陽無雁來。思君不可見。一日腸九迴。妾欲登崔嵬。我馬成虺隤。妾欲撥絲桐。離鸞聲悲哀。臨風長太息。覽鏡重徘徊。萱草可忘憂。奈此遲暮催。努力盡婦道。展我藜藿懷。願言太階平。懷抱同君開。奴家嫁與太真。纔方五月。指望與他同事萱親。承歡膝下。奈朝廷恩命。辟爲總兵司馬。差往邊方。別時以玉鏡貽我云。願如此鏡。就得團圓。到今數月。並無音信回來。又兼婆婆朝夕掛念。奴家只得自寬自慰。吞聲勸免。正是天長地久有時盡。此恨綿綿無絕期。〔詩〕親操井臼事溫郎。菽水甘心奉北堂。一旦中原烽火急。乘旄擁衆去勤王。

〔四朝元〕勤王應詔。匆匆離故園。見驪駒在道。骨肉分散。執手空留戀。嘆征車

莫挽征車莫挽。那更赤幟高懸。白刃紛然。錦纜雲帆。彩鷁如飛箭。那時節。呵教奴。怎不肝腸斷。嗟。歲月易推遷。倏爾經年。又是秋之半。蟾宮幾缺圓。良人去不返。天涯海角。思思念念。空瞻淮漢。（詩）曉妝羞澀怕臨鸞。多病多愁損舊顏。十二碧峯何處所。傷情無語自凭闌。凭闌慨嘆。無心理鬢鬟。看金鈿花褪。玉鏡塵滿。重門長自掩。盼薄情人遠。薄情人遠。閃得奴枕冷衾寒。影隻形單。消瘦腰肢。清減芙蓉面。寥寂難消遣。嗟。雲雨兩情慳。只落得減翠銷紅。淚溼青衫遍。君身名利牽。妾心鍾幽怨。苦夫南婦北。朝朝暮暮。空尋魚雁。（詩）別時容易見時難。烟火相違萬里間。一度相思一惆悵。愁看紅日薄西山。西山日晚。慈闈當暮年。奴只得執炊中饋。采藻南澗。勞瘁曾何憚。願蒼天保佑。蒼天保佑。保佑我姑嫜。鶴算童顏。松柏南山。榆景身康健。庶免奴耽憂患。嗟。我這裏意惓惓。夫。只怕你委質於人。怎遂得返哺慈烏願。征夫未解鞍。羈旅身淹宦。雕欄悶倚。淒淒感感。羞看歸燕。（詩）梧桐葉落雁來初。迢遞無從寄遠衣。遙望戍樓天欲暮。滿城鞞鼓白雲飛。雲飛楚陝。思君望眼穿。只愁着世

危時亂黎民塗炭。夫。你致力爲藩翰。願三軍奮勇。三軍奮勇。竭節輸忠。敢果爭先。掃淨妖氛。四塞旌旗偃。獻捷黃金殿。嗟。躬捧紫泥頒。剖玉分茅。子貴親榮顯。夫。你忠孝兩週全。恩寵光里閤。夫妻子母。懃懃懇懇。共同歡宴。

〔餘文〕乾坤觸處兵戈滿。藁砧此去幾時還。襟袖啼痕千萬點。

河橋日夜望歸舟。

腸斷秋江欲盡頭。

萬里交河音信斷。

悔教夫婿覓封侯。

第二十三齣 石勒報敗

〔北新水令〕〔淨扮石勒上〕金城萬里笑談塵。屈羣雄威加海內。氏羌咸俯首。典午復凌夷。奄有寰宇。跨雲龍自稱帝。虎踞中原氣勢雄。關南冀北屬堯封。待看收拾荆揚地。天下車書遂大同。寡人自稱帝號已來。將勇兵強。華夷懾服。左挈右提。東征西伐。執劉曜於關中。殪巴氏於湖北。奄有八表。底定四方。惟江南一隅。獨阻聲教。已遣張賓石生與兵渡淮。指日擊斬劉琨。溫嶠。生擒祖逖王敦。徑至石頭城。降了司馬睿。復使青衣行酒。執戟前驅。豈不爲快。昨遣細作。打聽

消息未見回報。如今軍中無以爲樂。況值秋飈。悶懷悒鬱。且召二姬宴飲帳下。聽候捷音。有何不可。正是折衝千里外。談笑一樽中。宣二姬出來。〔旦老旦上〕

〔前腔〕綺窗斜倚鬢雲欹。對秋空萬般情緒。鬱陶傷漏永。憔悴怯歌吹。忽聽綸音。整宮妝趨宸陛。我王萬歲。〔淨〕二姬免禮。浮光真一瞬。灑氣忽侵顏。混一是何年。吾心尙歉然。〔旦老旦〕陛下。字內已澄清。何苦復窮兵。黃花不常好。且把金樽倒。〔遞酒介〕

〔石榴花〕風雲際會建極號稱皇。包六合併遐方。江南餘孽勢猶猖。阻聲教違我王章。兵臨晉疆。縱長江天塹難爲障。管教他脚壁歸降。遍南服接踵梯航。〔旦

老旦〕吾皇勲業格龍荒。居中土制皇綱。四方風動配陶唐。又何必贖武遐邦。須當揣量。勸我王早返征南鞅。再休勞旰食宵衣。你且向花前擲舞傳觴。〔未扮

探子上〕健兒闔外探軍機。千里程途一日馳。汗馬不辭邊塞遠。轅門急報我王知。告大王。張謀主已被劉琨殺敗了。〔淨〕怎見得兵敗。喘息定。慢慢說來。〔未〕

〔北得勝令〕雲黯黯烟塵蔽日昏。鬧嚷嚷狐兔亂啼奔。密層層草木皆圖陣。溢

漫漫膏血沿淮浸。猛闕闕的劉琨。忽律律被他殺敗謀臣。急忙忙止不住星奔

夜遁。〔淨〕探子你休得張皇。石將軍有萬夫不當之勇。必然併兵往敵。何懼之有。探子你再去打聽

來。〔末〕領鈞旨。幾番承詔命。往復向邊郵。〔下旦老旦〕伏陛下。軍情務重。所當留心。且請停盃罷。

〔淨〕邊城小警。何足介懷。你可再整羊羔。重飄舞袖。劇飲一番。

〔泣顏回〕秋色已蒼蒼。忽驚看青鬢摧霜。心懷悒悒。嘆威聲尙阻荆揚。論我兵

力最強。投鞭可斷長江浪。須知叢爾江南地。應教反掌淪亡。〔旦老旦〕霓裳舞袖

對二郎。恩承蝶幸身御椒房。歡歌燕賞。對芳辰謾自淒惶。看韶華靡常。這浮光

倏忽堪惆悵。勸吾皇須惜餘陰。且優游莫爲人忙。〔丑扮探卒上〕勇將無謀大敗還。缺

戕破斧棄淮南。降兵十萬夜流血。辜負君王望凱旋。報我皇。石將軍已被溫囑殺敗。棄河北走了。

〔淨〕怎見得兵敗。喘息定。慢慢說來。〔丑〕

〔北鴛鴦煞〕猛將軍誤陷傷門陣。烏合衆紛紛蹈白刃。萬乘元戎皆成煨燼。棄

了神州。失守了江淮大郡。若大軍威當不過彈丸遺晉。大王須索要再整牙旗。

重興甲冑。蕩平了江南諸鎮。〔淨〕探子。急去報與石將軍。教他暫且回兵。待蓄養兵力。再圖進取。〔丑〕嗜。一函玉勅。君恩重。萬里星馳。使職勞。〔丑下淨〕二姬。猛將謀臣。相繼敗沒。如之奈何。〔旦老旦〕兵家勝負。自古無常。只宜養晦待時便了。〔淨〕正是正是。吾已醉矣。扶入寢宮去罷。

〔北胡蘆尾〕萬人敵。反遭了烏江刎。三尺劍。今向豐城困。怎能殺收復潰陷山河。重建了乾旋大運。

〔淨〕帝王歷數未歸吾。

猛士無功謀士疎。

〔二旦〕利鈍莫將縈念慮。

須知一忍是良圖。

第二十四齣 寄家書

〔喜遷鶯〕〔外扮劉琨上〕頻年征討。喜巨猾潛蹤。稍清江表。〔生上〕晦日重開。清平有調。四野歡聲載道。〔合〕露布馳聞。金闕絲綸。將下層霄。褒崇處。羨纍纍金印。煌煌丹詔。〔生〕兩河罷戰。萬方清。原上軍回。識舊營。〔外〕立馬望雲。秋塞靜。射雕臨水。晚天晴。〔生〕

尊舅。溫嶠荷蒙福庇。得佐下風。今日略有微功。可錄。庶不辜尊舅舉薦之意。〔外〕妹丈。劉琨久在邊

庭有失親炙。今幸二帥並捷。天假相逢。可喜可賀。昨日石勒部下張賓石虎被吾二人連戰殺敗。奔往北方去了。如今且喜軍聲稍震。江淮肅清。論功班爵。妹丈當居其最。(生)此乃祖元帥籌握之功。尊舅分麾之力。於下官何有。如今羌胡既敗。肝膽已喪。須乘勝逐北。擣其巢穴。譬如破竹。數節之後。迎刃而解。殲厥渠魁。迎還二聖。在此一舉。不可失也。(外)妹丈之言。固爲有理。但窮寇莫追。歸師勿掩。況我數戰兵疲。未可輕動。宜且解甲休兵。徐圖後舉。(生)尊舅說得是。

(惜奴嬌)衛國勤勞。藉羣帥雄才武略。翦卻天驕。喜太平有象。頃刻間大明重照。皇風已播。胡塵掃。杳沒個豺狼分擾。(合)念我曹。須要報國精忠。克全臣道。

(外)英豪志氣凌霄。欲待要柱石皇朝。藩維帝里。齊名周召。我二人呵。若不把傾頽晉社還重造。空負卻經邦才調。(合前生)尊舅。自別家鄉。杳無音信。未知萱親岳母

和妻室安否何如。(外)妹丈。此情此意。你我皆然。但天各一方。心懸兩地。奈何奈何。(生)迢迢水

遠山遙。盼鄉國白雲天杳。昊天罔極。念慈恃劬勞難報。只怕荆妻年少。甘旨未能供調。(合)念我曹。還待要報答春暉。克全子道。(外)遼遠。目斷魂銷。念母氏餘

齡衰老。慈幃夢遠。怎做得克諧以孝。烽烟隔絕魚鴻渺。誰爲我傳音耗。〔生〕尊舅。王師雖得勝。中原未復。一時怎得回家。如今各修書一封。差人馳駟送去。以慰家中懸懸之望。〔外〕妹丈說得是。〔寫書介生〕書已寫完。左右。即時叫鋪兵遞去。不許稽遲違限。〔末〕領鈞旨。正是。人邊戍久。鄉信到家遲。〔下淨扮報人上〕將星沈渭水。凶問報轅門。小人乃祖元帥帳下旗牌。俺元帥破敵成功。未及受賞。先已薨逝。特將訃音報與二位將軍知道。這裏正是營前。不免進入去咱。〔見介〕告將軍。祖元帥昨日午時病故了。〔生外驚介〕天那。天不欲使國家恢復中原。何奪吾士雅之速耶。〔悲介外〕

〔江兒水〕聽伊語。教我淚雨飄。哲人萎棄真堪悼。元帥。你勳庸未克遂分茅。遽然跨鶴歸華表。妹丈。我和你聊束生芻攀弔。〔合〕淚灑西風。遙對着忠魂奠告。〔生〕元帥。想你那日渡江。中流擊楫之時呵。他的丹心壯。志氣豪。英雄奮擊中流棹。元帥。豈知勳績歸遺草。霎時間天柱峯摧倒。元帥死了不打緊。只恐人之云亡。邦國殄瘁。晉室興亡。渾難料。〔合前〕

百戰沙場不顧身。

關河千里絕腥塵。

方驅胡虜燕雲外。

又見星流渭水濱。

第二十五齣 得書

〔霜天曉角〕〔旦上〕西風荐爽。灑氣侵羅幌。辜負姮娥獨宿。寥寥此夜偏長。咫尺江山分楚越。故人千里傷離別。寂寞孤燈魂欲消。寸寸愁腸千縷結。兩處相思一樣愁。滿腔離恨壓蘭舟。高堂慈母倚闔望。游子天涯尙滯留。相見誠難別何易。等閒忽把韶光逝。人生會少別時多。幾許愁腸遠莫寄。妾自兒夫去後。勤勞中饋。供調甘旨。萱室姑嫜。子情兩盡。昏而定。晨而省。豈敢憚煩。冬則溫。夏則清。終無懈怠。正是難將寸草心。報答三春暉。奴家雞鳴卽起。盥漱問寢已畢。又當侍膳。如今天氣尙早。且少坐一回。

〔香遍滿〕嘆白頭二母皆當暮齡。晝夜縈牽夢想。每日雞鳴問寢高堂。豈敢憚勞苦。豈敢暫疎曠。怎學得慈烏反哺。報答我母氏姑嫜。丈夫。你爲王事多艱掌。高堂有母不遑將。我須當代你服勞奉養。每日躬調滋味。侍膳奉霞觴。到不

如荆釵裙布同歡樂守糟糠。日已向辰不免鋪設酒餚。請二親早膳。二親有請。〔老旦上〕

〔二剪梅〕游子何時歸故鄉。地隔參商。絃絕宮商。〔老旦〕征人千里向河梁。時

近重陽。目斷衡陽。〔老旦〕媳婦婢妾滿前。傭奴環列。何苦自執炊爨。親調飲食。雞鳴而起。夜分不

寐。辛勤奉侍。我二人受之何安也。〔貼〕孩兒。你生長榮華。那知烹飪。一旦有家。便能周悉。賢哉賢哉。

我與婆婆時常敬汝之孝。又且惜汝之勞。〔旦〕中饋乃婦人之職。若不親任。誠敬何伸。願二親年老。

只願常爲調膳。乃所甘心。何勞之憚。母親婆婆請膳。〔老旦〕親母。我和你只爲圖着孩兒三牲五鼎。

心中增了許多離緒。到不如田舍翁終身樂業。白頭相守之爲愈也。〔貼〕親母說得是。〔做喫膳介〕

老旦

〔羅帳裏坐〕孩兒自從玉關去後。撫時感傷。雖有膏粱味。無心宴饗。孩兒只因你

忘了遺羹。承親母推食的厚賜。〔合〕這恩義總難忘。媳婦。你這般賢慧呵。你的孝行

真堪旌獎。〔貼〕親母。我和你形衰力倦。青鬢染霜。縱有八珍饌。恐難長受。生前養

孝順的兒呵。看你辛勤供菽水。誠敬奉蒸嘗。只願我的劉琨和賈壻二人呵。〔合〕願他

此去調羹廟廊莫做了伴食的宰相。〔旦〕憶同花前宴賞。玉粒桂漿。到如今盃盤冷落。饗殮久曠。丈夫你休把我炊屨屨烹伏雌的恩忘。〔合〕丈夫你便有食前方丈。須索記舉案齊眉的孟光。〔老旦〕飲膳已畢。且把盃盤收拾過去。取金錢來卜遠人消息。〔卜介〕

〔劉潑帽〕神著祕訣誠無妄。吉凶休咎託青囊。好卦好卦。看此卦真絕唱。〔合〕中正遇乾剛。是龍德方亨之象。〔貼〕我也卜一卦。〔卜介〕好卦好卦。大川利涉宜攸往。大入利見遇非常。此卦雖好。只恐國家任重。二郎一時不得返家鄉。當重任爲保障。〔合前旦〕

奴家也卜一卦。〔卜介〕看此卦呵。五行四兆看無恙。二爻內騰蛇纏足。哥哥與丈夫只恐皆被滯留邊塞。諒他的進退好似觸藩羝羊。第三爻文書發動。想必就有信息回來。寄萍

跡衡陽雁行。〔合前末扮駙使遞書上〕淮海寄雙魚。星軺日夜趨。善傳天外信。慣達世間書。小人

乃中原駙鋪兵。傳遞家書到劉太尉府中去。這里正是不免進入去。〔見介〕告稟二位太老夫人。劉太尉溫司馬二位老爺有書。〔貼老旦〕拿上來。〔梅香接介丑〕差人不知溫相公教上覆我麼。有甚

麼人事寄來送我麼。〔末〕這個沒有。〔貼老旦〕謝天地。果有信息回來。可徵卜著之驗。〔貼〕梅香。此乃家報。不比公文。來人當以酒飯相待。〔末〕感謝太老夫人。正是相思千萬里。一字值千金。〔下老貼〕媳婦把家書拆封。讀與我二人聽。〔旦〕這封是丈夫的。〔讀介〕

〔小桃紅〕溫嶠百拜。岳母萱堂。只爲勞王事。遠離故鄉。母子和夫婦。兩地久參商。違定省。絕溫清。把斑斕疎曠也。凝望孤雲。欲斷腸。料二母偕妻室。各保安康。封寄陽關啼數行。這封是哥哥的。〔又讀介〕劉琨頓首。書附衡湘。蝸角虛名累天。各一方。不能似曾參。終奉養。只落得瞻望陟高岡。喜塞塵。雖稍寧。問歸期。猶羈鞅也。未審何時脫鎖韉。料慈恃暨賢妹。福履勝常。晝夜思親淚兩行。〔貼〕且喜吾兒若兒。功名皆已成就。不枉母氏教育之恩。今日有書回來。正古人所謂千里如面談。我三人懸懸之望。此可少慰矣。

〔餘文〕萍蹤游子滯遐方。目斷天涯重慘傷。爲見佳音喜欲狂。

〔貼〕萬里交河形影疎。

〔老旦〕母思游子婦思夫。

〔且〕金錢卜得平安信。

〔合〕果見鴻傳尺素書。

第二十六齣 王敦反

〔菊花新〕〔淨扮王敦上〕朝廷昏眊縱姦謀。淹棄吾曹如寇讎。積忿起戈矛。要使清流作濁流。羣小專權擯上卿。妨賢病國忿難平。一朝興起晉陽甲。指日還將君側清。王敦世受

晉恩。本不當怨望。但近日主上昏曠。奸雄竊柄。狗尾續貂。忠良擯斥。不勝一時之忿。舉兵武昌。據石頭以脅制君父。加九錫而妄自尊崇。僭竊如此。無復爲盛德事矣。罷罷。男子不能流芳百世。亦當遺臭萬年。昨已上書罪狀劉隗刁協。若朝廷自能覺悟。二首朝懸。諸軍夕退。倘執迷如初。吾將稱兵向闕。放太甲。誅四凶。居攝禪祚。任自爲之。軍校請錢軍師出來議事。〔末扮錢鳳上〕

〔前腔〕圖王霸業藉謀猷。晉國江山撚指收。談笑覓封侯。管葛良平是我儔。自家錢鳳是也。蒙主公寵任。言聽計從。戰勝攻取。若論我主威德。宜稱王號。自家累表勸進。再三謙讓。不從。如今定要強他受禪便了。〔見介淨〕錢世儀。外事如何。〔末〕伏主公。劉隗刁協兵敗逃亡。晉帝遣百官詣門待罪。主公何不趁此機會。誅其君而弔其民。纂成大統。開基應天。時不可失也。〔淨〕軍

師。自百百足之蟲。至死不僵。今天子雖弱。羽翼尙多。且宜待時而動。不可造次。〔外扮周顛上小外扮戴淵上〕

〔前腔〕無端賊子起邪謀。烈士攢眉把國憂。奮志欲安劉。一劍何能驅沐猴。

〔小外〕下官司寇戴淵是也。〔外〕下官司空周顛是也。吾二人奉旨去見王處仲。此行當以逆順論之。使知反正。萬一不從。有死而已。可於苟且求活耶。〔小外〕周大人。此賊久懷異志。特畏祖士雅耳。今士雅已亡。彼無所憚。恐非口舌所能濟也。〔外〕軍士通報。〔丑〕老爺。百官在門外。〔淨〕軍師。你且入幕迴避。〔末〕忝與腹心任。堪爲入幕賓。〔下見介外小外長揖介淨〕司空司寇。錢世儀勸我卽位。你二人怎麼說。〔外〕呀。都督差矣。公家世受國恩。盡忠累代。要當世濟其美。克全大節。豈可信賊臣錢鳳之言。突起邪謀。自取族滅。〔淨〕二位。天下乃天下人之天下。非司馬氏一人之天下。昔舜禹受禪。湯武應天。於我有何不可。〔小外〕都督。昔文王三分天下有其二。以服事殷。今都督德非文王。主上又無獨夫之暴。豈可妄爲。事宜三思。〔淨〕庸才不識大體。反把言語來挺撞我。以我今日之勢。與一旅之師。直至晉室。執子嬰於咸陽。殪商辛於牧野。誰能當我。你二人快去製黃袍。作禪詔。庶可轉

禍爲福。〔外〕都督息怒。你且歷數自古篡弑之人。能保首領者有幾。足下平日頗知書史。漫不知警何也。你今日若聽我言。回兵武昌。復修臣節。則晉氏君臣蒙福。足下身家亦安。如或不然。吾二人不過一死。何禍之足懼。但惜足下以垂白之年。懸首白旗。忘奕世之忠。反爲悖逆之鬼耳。〔淨〕胡說。你二人若不上表稱臣。降階舞蹈。就綁到教場去砍了。〔外〕反賊。我恨不斬汝萬段。豈肯從汝反耶。何不速殺我。〔淨怒介〕綁起來。〔卒按使跪外小外〕要殺便殺。何以怒爲。我國之三公。豈可屈膝。〔淨怒唱介〕

〔八聲甘州〕狂言犯上。對我前輒敢面折強抗。當車奮勇。好似怒臂螳螂。你逞着如簧辨口。相譏誚。到做舌劍唇鎗。受禍殃。〔合〕憐憫。管教你族滅身亡。〔外〕強臣肆陸梁。忠良士豈肯附逆阿黨。〔淨〕不附我。就把你凌遲碎剮哩。〔外小外同伸頸介〕反賊。任伊寸斬。難教我毀裂冠裳。人生自古誰無死。只要死得其所。吾復何恨。生前仗節全忠義。死後千年姓字香。〔小外悲介外〕大丈夫當慷慨赴義。何用悲爲。〔合〕休悵。舍生取義便死何妨。〔小外〕逆賊。何須較短長。論人生須要扶植綱常。丈夫在世。磊

落落氣宇軒昂。逆賊。你休猜做萍梗隨波浪。我是松柏堅真傲雪霜。〔淨〕你死休
要悔。〔小外合〕忠讜。亡身狗國萬死甘當。〔丑末〕書生不自量。對吾主直恁妄誕
猖狂。非吾窘辱。也是你自冒鋒芒。你死何益於世。縱粉身碎骨曾何益。溝瀆沈淪
枉喪亡。〔合〕追想。要生全除是俺首歸降。〔外小外〕逆賊。你雖蘇張更生。不能挽我金石
之志。只求速死。〔淨〕既然不降。綁去砍了罷。〔押介外小外〕丹心懸日月。身命等鴻毛。〔殺下生扮
王導上〕軍士報王司徒請留人。〔卒〕稟司徒爺。遲了。二位老爺俱已死了。〔生〕罷了罷了。處仲處
仲。我就見你滅門絕戶。〔哭介〕我雖不殺伯仁。伯仁由我而死。冥冥之中。負此良友。〔哭下末扮郭
璞上〕身乘黃鶴歸天上。塵拂清風來世間。都督留人。〔淨〕二賊皆已斬了。〔末悲介〕善人國之至
寶。況天子三公。豈可擅殺。王處仲。你舉動如此。豈能令終。〔淨〕郭景純你休閒說。我視二賊猶狐雖
腐鼠。殺之何害。久聞景純高於易學。試卜吾總統大運何如。〔末卜介〕卦爻凶險。謀逆難成。〔淨怒
背云〕此人又來求死。事出反掌。何謂難成。我曉得這是晉帝使他來說我。不免再試他看。郭璞。吾
壽幾何。〔末〕明公舉事。禍必不久。若還武昌。壽不可測。〔淨怒介〕此人言語不祥。拏去砍了。〔丑綁

介末脫衣走介丑。稟爺郭先生不見了。脫下衣服在此。丑快閉了大門。追尋出來。丑尋介末旋轉走介丑。稟爺郭先生法大。能會飛天縮地。怎麼拿得他來。淨胡說。一人拏不住。怎麼奪天。下定要拏來。丑拏介末鑽入瓶介丑。稟爺鑽入瓶裏去了。淨胡說。瓶有多大。鑽得進去。分明是你容情賣放。若不拿來。斬你示衆。丑伸手入瓶拏介咬住手介丑高叫介淨。連瓶擊碎。且看走那里去。丑擊碎瓶介碎瓶片片罵反賊介丑。郭真人。再不敢拿你了。不要罵。淨郭先生。你仙術真高。我特試先生耳。豈敢殺你。請出來與我相見罷。末空中應介。逆賊。你枉殺忠良。欺君罔上。豈能久在人世。我去了。兩袖清風蓬島近。一聲長嘯海天悠。丑稟爺郭真人騰雲去了。淨此事可爲怪誕。我一時無見識。要殺他。殺又殺不得。又被他侮慢一場。若論他著卜我事難成。自古道人情賢於夢卜。又道事在不疑。卜之何益。今日之勢。但以人事決之可也。妖術何足信哉。兵校。昨已宣詔去召溫司馬至帳下聽用。不知到否。你去打聽着。丑領鈞旨。

圖王雄據石頭城。

屠戮朝臣任縱橫。

妖術誣民何足信。

管教晉社一時傾。

第二十七齣 召太眞

〔謁金門〕〔生上〕耿耿愁見鋒生內屏。一扎天書傳外境。祇恐稱僞命。〔小外〕
〔扮劉琨上〕管籥欽承臺省。分闔親操斧柄。逆豎無端窺晉鼎。廟謨須預定。〔生〕
黃雲初斷塞塵空。淮漢澄清貢賦通。奮志正期收漢北。忽驚天闕起烽烽。〔小外〕秋風凜凜軍威肅。
紫電騰騰劍氣雄。劇虜驍夷皆授首。狂夫犯順敢撓鋒。〔生〕吾二人翦荆拓地。奏績天朝。尊舅榮擢
帥府。下官超遷樞密。正欲蕩平北虜。酬報君恩。不意王敦逆命。逼辱帝后。屠戮大臣。卽今有旨召下
官回朝。俺想近時天子政令。非由己出。此必逆敦恐我二人併力攻他。故矯此詔。以分其勢。如今尊
舅留此經略。下官奔回。以清內難。〔小外〕妹丈。此賊久蓄異謀。知其必有今日。妹丈旣承詔命。不
得不行。此去須當委曲濟難。務期綏安宗社。邊隅重任。下官自當竭力應承。〔生〕當今豪傑。惟舅與
嶠。二人同心。何憂外侮。今內事嶠請獨任。外事託在尊舅。必要協力同心。共舒國憤。

〔紅衲襖〕當日裏擁貔貅長驅出帝京。今日裏靖狼烟把山河重再整。正待要
空漠南還二聖。會明良頌太平。誰知道野麀鹿游陞廷。社鼠城狐棲內省。尊舅。

我和你只恐九仞功成一日傾。〔小外〕我也曾叩明廷泣請纓。我也曾握金符分閫命。欲待要把單于來繫頸。欲待要奏奇勳勒鼎銘。忽驚那股肱臣竊楚柄。向潢池弄甲兵。逆賊。你背卻當年歃血盟。〔生〕怎能殼跨天潢翦巨鯨。怎能殼斬荆棘清蹕警。怎做得幃幄謨謀能決勝。攬轡登車天下平。此時朝廷武備衰弱。社稷

危如累卵。我盼皇朝中心如咽哽。嘆國家存亡渾未定。我須卷甲兼行援帝城。

〔小外〕我昔日聽荒雞終夜驚。我昔日宴新亭傷異景。到如今總元戎居落屏。到如今破幽燕近乘勝。〔哭介〕祖士雅若在。豈使狂賊致此。也只爲五丈原墜將星。致此孛天狼當舍明。遙望楓宸涕雨零。〔丑末〕舟楫儀從。皆已完備。請老爺登程。〔生〕就

此拜別。

〔東甌令〕我赴君難傳羽檄。絕塞孤臣憂社稷。我國家凋弊之餘。復值此亂呵。眼看

朝市成陵谷。興廢信難測。王司徒帶袖手傍觀。可笑可笑。廟廊無計羞肉食。束手漫

無策。〔小外〕妹丈。你承君命遠馳驅。千里澗池須奮翼。此時國勢危疑。天子孤立於上。圍

城天子悲孤注。須勇往去援溺。妹丈你揮戈早著回天力。委曲綏邦國。送君千里。終須一別。方內之事。一以委托妹丈。登舟去了罷。〔生〕此行憑仗朝廷威福。或者就得清平。邊郵任重。尊舅惟盡心乃事。〔灑泣登舟介〕

〔尾聲〕江山咫尺分南北。萬里雲程爭奮翮。只願鉄鉞一麾除叛逆。

〔生〕拜詔旋征車。

〔小外〕揮戈除反側。

〔合〕眼望旌捷旗。

耳聽好消息。

第二十八齣 擊幘

〔勝葫蘆〕〔丑扮內臣上〕職任中官承詔命。頒王爵。錫封榮。玉勅一函。鸞輿千乘。爭看着石頭城。上有龍輿。俺自家官居近習。職掌黃門。供掖庭之灑掃。給椒房之使令。銀端左貂。黃衣廩食。光耀四星之輝。王爵手捧。天憲口銜。班列五侯之貴。供奉與朝參。善伺入主之喜怒。拾遺承顧問。能蔽元后之聰明。宮闈褻近。馳聲色以蠱惑君心。威福自由。恣奸險而中傷善類。朝士拜舞後塵。公卿頤指氣使。果然鼠憑社貴。真個狐藉虎威。好氣勢也呵。小臣今早伏承帝命。遣賚玉璽。

丹符裂畿內十郡。封王都督爲吳王。又賜王姬媵妾。輅車鹵簿。教坊樂器。八寶九鼎。異器奇珍。不知其數。國家數十年積聚。一旦盡需東府。可憐可憐。左右的。如今天色漸明。吳王將次陞殿。朝儀仙仗。俱已完備了未。〔未〕告老公。龍牀龍衾。鳳盤鳳旗。俱已完備了。〔丑〕既完了。請爺爺陞殿。〔末下淨上〕

〔賀聖朝〕踐祚將移九鼎。掃除州郡初清。英雄有志事垂成。一着戎衣大定。

〔丑〕爺爺千歲。〔淨〕黃屋初乘左纛從。紫微光照海門東。滿朝文武階墀下。萬里山河掌握中。我自戮諸兇已來。朝野畏憚。罔肆陸梁。本欲就移晉室。猶恐人心未服。姑且先假王號。漸圖卽眞。昨日温太眞已到。我想丹陽咽喉之地。欲令鎮守。無過此人。況太眞乃我交契。決不相負。且待錢軍師出來。與他商議。內使宣温樞密錢軍師上殿議事。〔生上〕

〔前腔〕屈膝佯從僞命。胸中順逆常明。〔小外上〕蛟龍池上欲飛騰。渭水熊羆方騁。〔生小外〕我王千歲。〔淨〕二公請升殿。有事計議。丹陽國之重鎮。欲得心腹一人去守。以防不測。二公孰可。〔生背云〕我正欲出守丹陽。以圖圍賊。忽有此議。莫非天也。如今不免佯舉錢鳳。彼必憚行。

轉推於我。果得遂此行。大事成矣。主公。世儀精神滿腹。麾下諸臣。無出其右。〔小外〕伏主公。運籌轉。轉。轉。不如臣。折衝千里。臣不如驍。臣請留侍左右。太真可令出守。〔淨〕世儀言是。太真不可推辭。即便領符前去。將酒過來餞行。

〔皂羅袍〕閩外金符傳命。念丹陽喉咽。責任非輕。好施謀略。往經營。莫教荆棘。萌岐逕。〔合〕深溝高壘。堅甲利兵。華夷威震。關河肅清。南都拱手。傳君令。〔生〕忝荷方隅。威柄。感吾君厚寵。重寄垣屏。〔背介〕此行去就。總難憑。逆賊難教。我背主從邪佞。〔合前小外〕太真。你再把師徒爰整。羨君侯才略。遠過良平。好憑一劍。靖滄溟。四方底定。無烽警。〔合前生背云〕此行雖出世儀舉薦。只恐面是心非。去后決行讒謗。

如今不免設一巧計。以杜讒賊之口。〔假醉介〕世儀。宿昔曾爲刎頸。荷君家汲引。獲寄長城。〔把酒介〕擎樽握手。與你論平生。世儀。休教忘卻金蘭訂。〔小外〕下官醉了。飲不得了。〔生〕呀。溫太真行酒。錢世儀何人。乃敢不飲。〔手扳小外帽落介〕小外怒介。太真。你好粗率。惟酒無量。不及亂。怎生強得。〔淨〕太真醉了。休要怪他。〔小外〕何足計較。〔背云〕畜生無理。且待他去。

着〔淨〕太真。軍務緊急。就此啓行去罷。

〔餘文〕馬離建業敲金鐙。祖帳軍門餞曉行。何日輿圖樂太平。〔淨〕符分半虎鎮丹陽。〔生〕劍躍雙龍入武昌。〔小外〕前筭籌來平六國。〔合〕鞭梢投處斷長江。〔淨外下生弔場〕叫左右。速將檄文傳布各處藩鎮。叫他作速興兵。約會於石頭城下。候我軍令。同時進取。又將密書二封。送去王司徒及王彬將軍。叫他整兵。以爲內應。連夜速發。不得有違。〔合〕一朝權在手。堪把令來行。〔下〕

第二十九齣 丹陽兵報

〔末扮將軍上〕文昌新入有光輝。紫界宮牆白粉闌。曉日雞人傳漏箭。春風侍女護朝衣。自家乃吳王殿前將軍是也。今早我王御朝已畢。如今將下便殿議事。着小將鋪設繡墩。御宴。相將整頓已完。殿下早上。〔淨上〕

〔生查子〕三傑運良籌。擬變家爲國。〔小外〕虎豹添羽翰。心膂恐難託。〔淨〕招來熊虎將。引作腹心臣。〔小外〕莫信直中直。預防仁不仁。〔淨〕軍師。你爲何出此言。我前日遣太真去

守丹陽。觀他智勇謀略。必能與敵抗衡。爲我作江淮保障。付托可爲得人矣。〔小外〕主公作事常慎於始。用人須察其心。太真與朝廷甚密。不可深信。且丹陽天下兵衝。今遣此人去守。使英雄得用武之地。正所謂藉寇兵而齎盜糧者也。非惟不爲我用。竊恐反爲我敵矣。〔淨笑介〕太真昨醉。少加聲色。何得便爾相譏。〔小外〕主公錯矣。錢鳳豈爲此小嫌介意。但事關休戚。不得不言。自古道明者觀未然。況已著乎。今日不聽逆耳之諫。只恐突決棟焚。變生不測。悔之晚矣。〔淨〕自古用人不疑。疑人不用。太真素與我厚。決不相負。你不須多慮。〔小外〕事在預防。若待羽翼成后。噬臍無及。〔淨〕不妨。溫嶠果有他意。王含在外。取之如摧枯拉朽耳。何懼之有。〔未上報介〕有事不可不報。無事不可亂道。告殿下。溫樞密到丹陽。號召四方兵衆。移檄遠近諸侯。聲言討主公謀逆之罪。地方一時搔動。如何是很。〔淨〕這斷果然如此忘恩。確如軍師所料。吾今乃爲小賊所欺。可惱。可惱。〔小外〕適間主公固執不信。今竟何如。〔淨〕罷罷。是我得之。是我失之。亦復何恨。

〔雁過沙〕驚塵起蕭牆。干戈忽擾攘。都緣我自不揣量。卻把在桀虎兕放。溫嶠這賊子呵。你怎敢忘恩欺罔。背卻我推食推衣恩養。〔小外〕檄書自丹陽。腹心

起禍殃。溫嶠倚仗你做個渭水鷹揚。誰知道反做了揮鉞博浪。今民心未忘晉室。只

恐赤幟一起呵。四方豪傑應如響。霎時間轉弱爲強。〔末丑〕主公只爲不聽軍師之言。

故有此害。看他徒薪金非妄。今日呵。竈突果炎上。軍師妙算世無雙。主公今後只依

軍師之言。何患大事無成。你的龍興帝業堪倚仗。早教登壇爲大將。那乳臭兒怎

敢當。〔淨〕軍師事已至此。計將安出。〔小外〕主公不必多憂。自古弱不可以敵強。寡不可以敵衆。主

公今日之勢。諒非溫嶠所能敵。宜速令王含戒嚴守備。一邊差人拘溫嶠母妻至此爲質。令其作書

招之。何患太真不降。〔淨〕軍師言是。軍校傳與王將軍。叫他謹守城池。密地差一隊軍馬。去太原擒

溫家母妻。不得有違。〔衆〕領鈞旨。

〔淨〕忽傳闔外腹心離。

〔小外〕船到江心補漏遲。

〔卒〕本待將心託明月。

〔合〕誰知明月照溝渠。

第二十齣 拘溫家屬

〔卜算子〕〔老旦上〕邊戍幾經年。四序頻遷變。窮愁堆積在眉端。早夜難消遣。

〔旦上〕藁砧今何在。山上更安山。新愁舊恨兩縈牽。人去何時返。〔老旦〕〔浣溪沙〕玉露凋傷楓葉淒。東征游子未言歸。倚門終日思依依。〔旦〕玉枕夜寒鴛夢斷。金鈿秋盡雁書稀。彩毫空寫斷腸詞。〔老旦〕媳婦。你丈夫當初出去。只道便得回家。誰知久留邊戍。奈我年當衰暮。疾病來侵。怎得個團圓的日子。〔旦〕婆婆。前日丈夫書中說。邊警稍平。料目下便可凱旋歸第。婆婆不必愁煩。〔老旦〕媳婦。只今天氣將寒。邊城久役。狐裘蒙戎。如何是好。〔旦〕奴家累積蠶繅。如今織作征衣。令人送往邊塞。〔織介老旦〕媳婦。你既親執其勞。我當拮据相助。〔旦〕

〔山坡羊〕冷颼颼寒風如箭。夜淒淒寒砧搗練。愁感感把金梭擲拋。啁啾啾促織聲如勸。綴錦紋錯綜緒千萬。攪得奴心如麻亂。夫。未審何時。重諧繾綣。〔合〕惓惓。織就迴文獻九天。懸懸。織就寒衣送玉關。〔老旦〕眼睜睜倚門顚盼。悶懨懨。懨懨。懨懨。懨懨。軟怯怯潦倒孤孀。恨綿綿日暮桑榆短。記別時曾與他密縫針線。兒。早期你衣錦榮里。誰知道利縮名韉。幾見了星移物換。〔合〕堪憐。授征衣爲禦寒。何年。戲斑衣到膝前。〔旦〕亂紛紛西飛歸燕。嘹嚶嚶南來征雁。杏花茫

茫信阻衡陽。淚汪汪界破殘妝面。一寸心猶如繫着千尺線。柔腸百結牽縈絆。
夫。你今戀着補袞榮華。也索記牽絲的姻眷。〔合〕惓惓織就迴文獻九天。懸
懸織就寒衣送玉關。〔老旦〕思悠悠離情無限。顰蹙愁眉難展。子莞莞姑婦
孤單。擾攘擾觸處遭兵難。兒成就你繡黻經綸的手段。休忘我教子將機斷。〔鴉
噪介〕呀。烏鴉噪。敢有甚麼凶兆。怯聽鴉聲。當庭噪晚。〔合〕堪憐。授征衣爲禦寒。何
年。戲斑衣到膝前。〔未走上報介〕

〔不是路〕驟馬飛還。奔向堂前咽怎言。神魂斷。肝腸寸寸萬鋒攢。〔倒介旦老旦〕
呀。院子。你怎麼這等慌慌張張。〔未〕夫人。天大的事來了。怎生是好。〔旦老旦〕你緣何教人唬
得心兢戰。莫不是沙場凶信傳。〔未〕不是。王敦叛。〔旦老旦〕王敦作叛。與相公何干。〔未〕
我相公呵。只因不順奸臣願。來拘家眷。來拘家眷。〔旦老旦〕聽罷伊言。魄散魂
飛。寸膽寒。何讎怨。將人白地裏摧殘。淚珠漣。從今骨肉搏沙散。身命何由得保
全。〔老旦〕天那。孩兒在家到得安樂。如今做官。反被他連累。〔旦〕怎知有此橫禍。空埋怨。一家不

幸遭天譴。無門逃竄。無門逃竄。〔老旦〕院子。賊兵來到那里了。〔末〕須臾就到了。小人再去打探來。老夫人和小夫人快先走罷。正是一心忙似箭。兩脚走如飛。〔末下老旦〕媳婦。賊兵來近。我和你拋家走了罷。正是閉門家裏坐。禍從天上來。〔下淨丑扮兵卒上〕

〔紅繡鞋〕操戈執戟。搖旗。搖旗。披霜日夜星馳。星馳。猿驚獸挺。肆雄威。承主命到山西。擒溫嶠母和妻。〔淨〕衆兵圍住溫家。一個個都擄起來。解去稱賞。不可走了一人。〔丑末〕怎的無人在此了。想是那邊宅子上。〔淨〕那邊是劉太尉的家眷。不要驚動他。溫家母妻。一定走出在外。我和你趕到路上去。拏他。〔下旦老旦走上〕

〔香柳娘〕苦奔馳在路岐。苦奔馳在路岐。如醉如癡。一朝禍起蕭牆裏。見紛紛騎追。紛紛騎追。城火及魚池。脚冤籲天地。恨奸雄恣肆。奸雄恣肆。擾亂邦畿。乾坤鼎沸。〔下淨丑上〕

〔紅繡鞋〕笑他乳臭嬰兒。嬰兒。敢與吾主廝持。廝持。撩蛇踐虎不知機。今日裏別雄雌。遭剝辱受災危。〔下旦老旦上〕

〔香柳娘〕嘆征人遠離。嘆征人遠離。邊城淹滯。誰知平步風波起。顧乾坤四圍。水隔與塗迷。難尋脫身計。苦疲羸怎支。苦疲羸怎支。窮困誰依。人離業廢。〔旦老旦欲下淨丑攔住介〕不要走。不要走。快來就縛。〔旦老旦驚倒介淨〕都綁起來。〔旦〕

婆婆年老。望乞容恕。〔淨〕那里管你。只是綁去。〔旦老旦〕

〔餘文〕魂欲逝淚交頤。半世生涯頃刻危。縲絏纏身怎脫離。

〔淨〕堪笑書生不見機。

〔丑〕教他闔室受災危。

〔老旦〕從來禍福由人召。

〔旦〕須信人欺天不欺。

第二十一齣 繫獄

〔虞美人〕〔淨上〕奸雄背主心懷二。敢肆螳螂臂。將傾晉社總難支。縱自粉身效報曾何濟。〔小外上〕入幕善謀。底囊多智。幾將羣策屈羣雄。爭奈吾王忽卻經邦計。〔見介淨〕耐耐溫嶠背逆無狀。昨已差人去拿他家屬。怎的還未拿到。〔小外〕門外喧嚷。想必

拿到了。〔末丑押旦老旦上〕

〔訴衷腸〕災殃天降非由己。陷筭難迴避。不能明哲保身。可憐百口爲累。〔丑末〕告殿下。溫嶠家屬拿到了。〔見介〕犯婦。你的孩兒受我爵祿。去守丹陽。如何背義。反順朝廷。起兵犯我。今日拿你兩個。別無話說。只要你寫書招他來降。富貴共享。若是不從。就要你粉身碎骨哩。〔老旦〕告都督。溫嶠昔爲吾子。今爲王臣。去就從違。非由老身張主。〔淨〕這婦人奸詐。還敢說此大話。好打哩。〔小外〕女流之輩。不知事體。主公且從容問他。不須發怒。〔淨〕也是。溫母時事有與廢。爲人當識機。今者晉室欲亡。雖三尺童子皆知。你的孩兒。素稱智略。何獨暗昧如此。況我平日與你孩兒交好。你若不快招他來降。只恐國家敗亡之日。玉石俱焚。那時悔之晚矣。〔老旦〕大人。老身只知順逆。那曉興廢呵。〔淨怒介〕這婆子可惱。怎的叫做順逆。你就說來。〔老旦〕

〔孝順歌〕事君的忠義先。人臣大分敢有愆。龔勝願捐生。蘇卿豈忘漢。我孩兒呵。他的堅貞難轉。果若要使招降。我姑婦寧甘伏劍。〔淨〕今四方貢獻。皆入吾府。將相岳牧。盡出吾門。你孩兒一人。濟得甚事。快叫他來降。以免一家性命。〔老旦〕君子有殺身得以成仁。吾兒今死王事呵。縱然馬革包屍。國史清名無玷。〔淨〕休要誇口。你兩個今日被我拘收在

此。不怕你不寫書哩。〔旦〕吾夫子他是當世賢。丹心壯節日月懸。伏毒慕樵玄。納肝效弘演。〔淨〕胡說。若不寫書招你丈夫來降。你兩個休想生哩。〔旦〕要殺便殺。今日夫爲忠臣。妻

爲節婦。死亦何恨。我丈夫呵。他竭忠赴難。我願全節忘身。怎肯低頭從叛。〔淨〕這等

說。就拿去砍了。〔旦〕縱然鼎鑊交加。我雖九死無憾。〔淨怒介〕我有移天勢操着

生殺權。這兩個婦人好無禮。無端佞口敢犯顏。左右。把二婦人撈起來。要他寫。固執若仍

前。教恁觸刑憲。〔旦老旦〕天那。這苦怎生受得。〔哭介小外〕二位夫人寫了罷。省得受這苦楚。休

得淚漣。要解倒懸。須是早從權變。〔老旦〕錢先生。我二人寧受斧鉞之誅。難從逆命。〔小外〕

夫人。事已至此。不得不從。你今是釜裏之魚。怎禁得百般熬鍊。〔老旦〕自古道死有輕

於鴻毛。我姑媳二人只要中心無愧。萬死不辭。我生無愧死亦安。堂堂此身肯瓦全。視

死卻如歸。偷生豈吾願。〔小外〕二位夫人。事關門戶。不可執一。且宜暫時從順。以解目下之危。

〔旦老旦〕我甘自摧殘。怎肯向狗彘屈身。乞憐求免。〔淨怒介〕這賊婦把我比做狗彘。

拿去砍了。〔小外〕跼之犬吠堯。豈堯不仁乎。主公不必計較。二位夫人。你不聽我說。休要悔。〔旦老

〔旦〕罷了。千死萬死。無過一死。若還苦逼禁遲。早請將頭來斷。〔淨〕果然不從。推出斬了罷。〔丑末押走介小外〕主公。小不忍則亂大謀。今日殺此二婦。不打緊。只恐溫嶠蓄忿。致死來與我戰。反添一勦敵矣。不如且把二婦收監。遣一辨士說他寫書。事或可就。若再堅執。殺之未晚耳。〔淨〕軍師言是。且饒他。收到監裏去。〔末丑〕領鈞旨。〔押下〕旦老旦。精靈萬古昭鍾阜。一死鴻毛斷不渝。〔下淨〕軍校傳與王彬。教他去獄中勸二婦寫書。書如寫成。就教他賚往丹陽。說溫嶠來降。〔末丑〕領鈞旨。

〔淨〕不施萬丈深潭計。

〔合〕怎得驪龍領下珠。

第三十一齣 獄吏相戒

〔水底魚兒〕〔丑扮刑吏上〕性嗜苞苴。經書目不知。有錢陪笑。無錢翻臉皮。吾乃刑曹司吏。專一欺公作弊。語言當面撮空。行事千般詭秘。上司假托腹心。法律視同兒戲。洗補改換卷宗。出入罪名隨意。有錢死者復生。無錢生者沒世。不管枉事屈情。定要貪緣使費。鄉民那曉奸謀。任我謀爲擺置。裝成圈套機關。饋贈門迎如市。只求才賄盈囊。那管遍賣田地。〔笑介〕犯人到我房

中。果然是個悔氣。〔內問〕你每這等兇狠。只怕身家被累。〔丑〕不管他上司訪察有名。拚個充軍徒罪。〔淨扮獄官上〕

〔前腔〕職任卑微。俸資薄又稀。若不貪賄。妻兒喫甚的。我本秋曹司獄。爲官一味貪

酷。胸中惟嗜苞苴。杖頭只打錢穀。酒席專爲抽風。言談盡藏騙局。下監推審犯人。量財以爲直曲。富翁蘇放長枷。窮漢嚴加桎梏。不求清白傳家。只要滿贏金玉。〔內問〕你每這等貪婪。難掩上司耳目。

〔淨〕不管他繡衣考察官員。拚個兩腿無肉。〔見介淨〕叫禁子拿監簿來看。新到犯人趙一。未有拜見錢。扯下打二十。〔末打犯人譚介淨〕新到犯人溫氏等二口。聞知家道發跡。要他分例五十兩。昨

已設酒送去。請他打抽風。要他二十兩回答。快去催來。〔末〕他是官家。這一起只得將就些。〔淨丑〕王親犯法。與庶民同。怎麼將就得。〔淨〕重犯有分例的。蘇了枷。張四李八無錢。上起枷來與比較。

〔丑〕張四家道富。不要枷他。〔淨〕怎的不枷。〔丑〕既富矣。又何加焉。〔淨〕且饒他。只把李八枷起。

〔丑〕李八家貧。不要枷。〔淨〕怎的也不枷。〔丑〕加之以飢饉。要餓死了。〔淨〕提控還是讀書人。說得有理。一發饒他。〔末〕南監北監。已安排酒。請老爺暖寒。〔淨丑〕如此便去。正是三杯和萬事。一醉解

千愁。〔下末〕老爺。老官去了。且叫各監主出來商量討錢則個。〔淨扮牢頭上〕含冤昔日罹天網。困
園于今作福堂。禁子哥。今日賣買如何。〔末〕便是不濟。如今老爺老官要見面錢。又要酒喫。表子陪。
一應酒店各色樣銀。都靠在犯人身上。這兩日沒人收監。甚是清淡。如何是好。〔淨〕這有甚難。監中
常例。多討些。就殼用了。〔末〕怎的要得他的來。〔淨〕我教你。犯人沒錢的。枷紐鎖鑰。不要蘇他。
日間不許他喫飯。夜間不許他在牀上睡。飢寒難忍。便是鐵人。也要使錢。怕他不殼用。〔末〕這等要
惹禍。〔淨〕也看人。若遇刁頭。便用將就。若本分子。及財主有身家的。怕他怎麼。這等人極好待他。
常常買些酒請他。他喫了酒。自然用回答。又常常暗地般唆是非。弄他相打相罵。兩邊過面。酒又有
得喫。錢又有得送。又時時誑說。聽得上司與外郎說某犯人虧枉。外郎好生替你方便。有等呆人聽
信。將銀子央你去囑托。或打探消息。定不白過。〔末〕自古道。接人錢財。與人消災。哄他銀子。不替人
幹事。可不抱怨。〔淨〕衙門人都是撮空趁錢。只要哄得錢財落手。那管他人痛痒。〔末〕這等斷主顧
買賣。下次誰人信你。〔淨〕不妨。下次又換個圈套騙他。又有件好買賣。如今監中有許多強盜在此。
叫他分頭扳枉各縣財主。他必着人拿銀子來央你除名。不來行移的。報上名字。行牌去拘他到官。

朦朧官府。只說是賊。那里曉得都是平民。自古道賊口出聖旨。真假皆憑賊說。不怕他不多拿錢來買求脫白。〔末〕這等狠毒。〔指天介〕只怕上頭的人。不放過你。〔淨〕有甚天理。我當初活打死人。問死罪時。家當不濟。如今做了監主。被我置借大家產。官府提控。與我相交。禁子皂隸。服吾驅使。犯人磕頭拜跪。真個朝朝飲宴。夜夜元宵。妻子在家。享不盡的富貴。如今可惜已老要死了。世人要學我的。快去打個人死。來頂我的缺。叫他一生受用不盡。禁子哥。那兩個婦人。問他討些兒。〔末〕又來惹禍。這是溫樞密的家眷。不當要。〔淨〕我自不怕他。官府知道。不過打幾板。難道再問個死罪。倘送些錢鈔。落得受用。正是

今朝有酒今朝醉。

明日愁來明日當。

第二十三齣 獄中寄書

〔憶秦娥〕〔老旦丑扮梅香扶上〕身勞瘁。神魂失次。渾如醉。渾如醉。衰病餘齡。怎當驚悸。〔旦〕夫君仗節勤王事。妻孥母子皆遺累。皆遺累。許國純忠。闔門全義。〔老旦〕我生之初尚無爲。我生之後國運衰。人民塗炭城郭壞。禮義滅亡法度隳。身流落兮天一涯。

腸欲斷兮心欲摧。〔旦〕暗室寥寥風雨淒。長夜迢迢更箭遲。夫與妻兮忽此離。姑與母兮生死安。足知義重命輕兮鴻毛如。誓捐此生兮全網維。〔老旦〕媳婦我和你被王敦羅織於獄。如今肢體雖完。心膽已喪。殘骸餘喘。與死爲鄰。我當衰暮之齡。死無遺恨。但惜汝美質芳年。罹此大禍。如之奈何。〔旦〕婆婆。臣之死君妻之死夫其義一也。古有投崖之烈婦。斷臂之貞妻。妾何懼一死。但婆婆教子成名。不克一受褒封祿養。爲可恨耳。〔老旦〕媳婦。你看囹圄蕭條。寒風刮面。四顧愴惶。形影相弔。好苦呵。

〔月兒高〕體羸心惴。衰容頓顛顛。子母遭凌替。身陷家傾棄。顛沛流離。死無葬身地。反賊我宿稟冰霜厲。縱然九死心無一。苦呵。三木囊頭苦怎支。仰籲蒼穹知不知。〔旦〕夫狗忠義。妾身願隨逝。痛憶姑年暮。復險遭顛躓。及溺胥亡。共作忠良鬼。婆婆此身甘玉碎。怎把名污青史。天那。天胡不愍遺。闔室顛連控告誰。〔淨扮獄卒上〕貪婪爲活計。枉措作生涯。二位夫人。各樣常例如何說。〔老旦〕牌頭。我們倉卒被差人拘來。分文不曾帶得。如何是好。〔淨〕夫人差矣。自古道在山靠山。在水靠水。如今司獄老爺。提控老官。

常例風火一般在我處要。難道我替你喫杖子。監主柴水牀席家火秋風看監神福酒席守門等錢。難道不肯出。你若待我好。我也看承你好。你若吝錢。便是官家也要衝撞。〔老旦〕牌頭。一應分例。定然不少。待我親戚來日就有。〔丑〕牌頭要錢何用。〔淨〕娘子。你不曉得。錢之爲用。危可使安。死可使活。忿爭非錢不勝。幽滯非錢不拔。你爲有錢不用。在此受苦。〔丑〕這等說。我家錢儘多。早說待我挑一擔來與你。如今沒錢。馬子也沒人撥。〔淨〕娘子。自古道有錢鬼可使。你若冇錢。司獄老爺。六房提控。爭替你撥馬子。怕他沒人。〔末扮王彬上〕

〔菊花新〕忠良伏鎖實堪悲。節義雙高世所稀。吾忝與藩維。豈肯從謀不軌。王彬爲處仲所使。至囹圄中勸溫太真令堂寫書。我昨見二婦這等忠烈。一時感激。恨不得助順討逆。豈肯爲其作說客。以誘入於不義乎。如今見二位夫人。且休提寫書之事。處仲若問。只說書已寫寄太真便了。獄卒開門。我要見溫老夫人。〔見介淨下老旦〕大夫何來。〔末〕下官王彬。素與令郎交契。昨見二位夫人。丹貞貫日。不勝忻羨。我願夫人始終如一。不可畏其銖銖。少變清操。〔旦老旦〕多承規訓。謹當銘諸肺腑。〔末〕下官奉差。命往見令郎。如有尊簡。敬當附去。〔老旦〕如此卻好。媳婦代筆。

修書一封。央大夫寄去。〔旦寫介老旦〕

〔玉山頹〕衡陽拘繫。嘆惇惇身惟影隨。念一家瓦解冰消。好一似斷梗飛絮。大夫傳與吾兒。教他惟勤王事。切莫把母妻爲意。〔旦〕書已寫完了。〔老旦〕既寫完。拜奉與大夫。〔拜介合〕尺素傳吾子。〔哭介〕兒呵。只怕今生不得與你相見了。永相違。榮封祿養恨無期。〔旦出玉鏡介〕大夫。奴家當初賴此鏡與太真成婚。後夫君別去。誓以重逢。不料竟成畫餅。

相煩大夫寄還夫君。俾知我不久爲泉下客矣。菱花遙寄。嘆雙鸞此日仝離。從夫去久掩清光。料今生會合無計。逆賊。你縱有鼎鑊刀鋸。怎奪我清風高志。〔合〕尺素傳夫子。永相違。重諧伉儷料無期。〔丑〕使君聽啓。念奴身金屏侍兒。抱衾裯藉寵專房。到如今漂泊誰倚。俺一家愁無遺類。空使我寸腸割碎。〔合〕尺素傳吾主。永相違。承恩魚貫料無期。〔末〕聞言酸鼻。勸夫人不須淚垂。夫人。惟天相德。惟德合天。古今常理。你看湛湛青天。豈肯把哲人遺棄。下官雖在王敦門下。忠君報國之心。未嘗少間。此行自當與太真定計。裏應外合。勦除國賊。救出二位夫人。暫請耐心少坐。不必愁惱。〔旦老旦〕

如此多感。〔末〕聽我片言寬慰。管教你夫妻子母重會。〔合〕尺素傳賢子。暫相違。回天返照豈無期。

〔老旦〕相見時難別亦難。

〔末〕東風無力百花殘。

〔旦〕春蠶到死絲方盡。

〔丑〕蠟燭成灰淚始乾。

第二十四齣 拆書見鏡

〔高陽臺〕〔生上〕外難初平。蕭牆禍起。堪嗟寶鼎沈溺。百辟顛連。相胥盡罹鋒鏑。但自家腹心幸值君皇寵。須當竭股肱之力。秉忠丹風前勁草。心如金石。國破家何在。扶危命亦輕。欲吞豫讓炭。願結仲由纓。世事風前燭。浮生浪裏萍。滿腔忠孝訣。忍死敢偷生。自家素與逆敦友善。今彼既有虧大節。吾亦與之絕交。昨者用計出守丹陽。建牙集衆。據咽喉之地。以圖恢復。分遣檄書。約會諸鎮。同時大舉。如今不免練習兵衆。戒嚴啟行。多少是好。只一件。自從別卻母妻。頻年在外。竟不知家中音耗如何。正是天涯厭鶻旅。家鄉勞夢魂。

〔前腔〕目斷河陽。孤雲縹緲。高堂已添垂白。虎鬪龍爭。征人幾時寧息。嘆當年

絕裾輕分散。頓教人飲恨如怒妻。更憐你塵蒙玉鏡。雲情遼。隔左右。門外有報軍情的。着他進來。〔未扮王彬上〕家貧顯孝子。世亂識忠臣。自家昨日往獄中見太真母妻。心如鐵石。大節凜然。彼婦人女子。尙能如是。可笑沈充錢鳳之徒。阿附逆臣。竊不義之富貴。寧無愧於心乎。正是同時英俊顏何厚。未死奸雄骨已寒。今將書鏡往丹陽報與太真知道。這里正是幕府。不免入去咱。

〔生〕王大人何來。〔末〕下官有一事。報與樞密知道。〔生〕有甚事。〔末〕逆敦怪樞密起兵勤王。差人拘令堂令闔於獄。〔生驚介〕逼令作簡來招樞密降順。二位夫人誓死不從。〔生泣介〕逆敦復遣下官往獄中說之。下官頗知禮義。豈肯自毀綱常。到監惟以大義勸勉二位夫人。特領尊堂翰簡。尊闔玉鏡。來見樞密。書鏡在此。〔生讀書介〕逆敦以吾兒効順勤王。逮捕我二人於獄。逼令作書招汝。思惟吾家忠勳奕世。綱紀三朝。豈肯自隳其素履。陷汝於不義。故寧伏劍而死。飼肉於烏鴛。豈肯負恥而生。屈身於狗彘。汝其奮勵激昂。早赴君父之急。盡心王室。勿以母妻介懷。若皇天有知。庶幾君難可靖。親仇可復。倘心殫力竭。便當慷慨捐身。闔門死義。汝其志之。勿違吾言。吾無恨矣。臨簡悲咽。不知所云。〔生哭介〕王大人。下官只爲竭忠王室。致令舉家繫累。慈親若亡。吾其爲皇魚矣。

〔駐馬聽〕痛憶慈顏。刃剗愁腸血淚漣。也只爲憂先天下。致令母子分離。骨肉摧殘。苦方圖祿養報親恩。豈防今日翻爲患。大慟號天。大慟號天。昔趙苞母爲賊

虜。痛恨嘔血而亡。我今日呵。趙苞之恨料應難免。〔末〕樞密不必愁煩。我當以計給逆敦。必

要保全尊眷。請免憂煎。拯溺持危我當自斡旋。你休得要心勞內顧。戀戀私情。忘卻忠丹。勸君努力獨身先。縱橫百戰維多難。此時外多強寇。內有叛臣。正危急存亡

之秋也。樞密。你切莫偷安。切莫偷安。將頽漢日賴君揮轉。〔生〕多蒙指教。下官惟以

王事爲重。亦別無顧慮。但母妻在獄。倘可拯救。望大人哀憐。〔末〕君當奮力于外。我必維持于內。寶

眷若有半點差池。下官任罪。〔生再叩首介末〕大人。休將私意撓公事。好把忠良翊聖朝。〔下生弔

場外扮探卒上〕馬汗踏成泥。朝馳幾萬蹄。雪中行地角。火處宿天倪。報樞密。諸鎮兵皆已會合。只

等樞密號令。進兵攻城。如今逆賊遣王含總兵來伐丹陽。〔生傳令〕速整大衆。前去迎敵。

〔清江引〕邦危主辱王臣蹇。捲甲齊赴援。倚我若長城。怎敢圖身便。披堅執銳

甘百戰。〔丑末〕虎臣一身都是膽。叱咤真臬悍。霜刃氣橫秋。利鏃如飛電。風聲

凜凜山岳撼。風聲凜凜山岳撼。

第三十五齣 敗王含

〔金錢花〕〔丑扮王含帶卒上〕森森戈戟如霜。如霜連衡薄伐丹陽。丹陽驚鴻駭鹿亂奔忙。誅逆豎。取金湯。〔合〕移晉祚。篡君王。自家王含是也。只爲溫嶠背義歸晉。奉主公嚴命。提兵往討。前面塵頭起處。料是溫嶠兵到。軍校每。擂鼓排陣。殺上去。〔生帶卒上〕

〔前腔〕長驅虎豹龍驤。龍驤高牙大纛揮颺。揮颺管教一箭落天狼。翦荆棘。淨封疆。〔合〕通禹服。會明良。〔生〕反賊向前打話。〔丑〕溫嶠。我主公何等相待你。爲何忘恩。如今及早投降。席蓐待罪。可保母妻無虞。不然。九族皆死刀下。〔生〕反賊。汝無父無君。禽獸不若。我忘家狗國。與日月爭光。不須開口。〔上前交鋒。介丑淨敗下。生〕王含旣敗。乘勝殺奔石頭城。擒了王敦。不可有違。〔衆〕領鈞旨。

由來勲業屬英雄。

一洗鯨波輦路通。

先入賊巢擒首惡。

盡封府庫讓元功。

第三十六齣 擒王敦

〔生查子〕〔淨上〕大運應昌期。名諱登圖讖。威德振南天。一鼓收餘燼。虞廷將紹執中傳。晉氏須臾鼎播遷。非我敢收秦氏鹿。祇因天命屬龍顏。俺自起兵以來。僭竊位號。宰制朝權。天子不過擁虛位而已。只今萬民推戴於野。百僚勸進於朝。你看禪臺高築。將黃袍加身矣。乾坤重闔闢。民物再更新。人生際此。豈不稱大丈夫。近日只爲溫嶠這斷背恩。起兵丹陽。此乃纖介之疾。不足爲意。已冷王含率衆往擒。捷音未報。不免召沈充錢鳳二軍師籌議。軍師何在。〔外末上〕

〔前腔〕心懷六出奇。口注懸河論。二顧幸遭逢。坐使收乾運。主公千歲。〔淨〕軍師。昨日王彬回說。溫嶠聞母妻被繫。心持兩端。逡巡不敢與我挑戰。王含此去。一鼓可擒。〔外末〕主公。自古道。識時務者呼爲俊傑。溫嶠不知天命。敗亡必矣。何足惜之。〔淨〕正是正是。天氣嚴寒。且與二位軍師談笑鼎樽。決機幃幄。將酒過來。〔淨〕

〔玉芙蓉〕彤雲蔽太空。玉帳寒威重。念征人櫛風沐雨當鋒。軍師坐籌幃幄。資韜略。行陣決機賴折衝。〔合〕金甌奉。明良會逢。且鋪裊炙炭。談笑酒樽中。〔外〕台

階位望隆。前席承君寵。際風雲攀龍。附鳳登庸。揮鉏擊斃三秦鹿。掉舌鈎連六國從。〔合前末〕當年友赤松。膺聘爲梁棟。論奇勳伊周伯仲。英雄謀猷克壯。誇元老。魚水欣逢學臥龍。〔合前丑〕軍師元臣著匪躬。殿下聖主由天縱。看輿圖相將一統皇封。乾旋坤轉。河清晏。航海梯山萬國通。〔合前卒上報介〕力盡弓肅怯。天亡馬力窮。英雄悲失路。無面見江東。報我王。王含將軍大敗逃亡了。〔淨〕吾兄老婢何足以赴大事。如今我與二位軍師自往督戰便了。再去打聽來。〔卒啞下又卒慌上〕報報報。禍事到不好了。〔淨慌介〕怎麼的。〔卒〕溫樞密統領大隊人馬。長驅而來。司徒老爺。王彬將軍。開門降納。我兵盡皆潰散。不濟事了。二位軍師雖有奇謀。不能賦詩退賊。須索望風逃避。如今也顧不得主公了。各自逃生罷。雙手擊開生死路。一身跳出是非門。〔外末卒逃走介生帶卒撞上〕

〔水底魚兒〕高鳥傷弓。驚飛絕影蹤。長驅乘勝。窮策一掃空。軍校。綁了反賊。〔綁介〕把反賊上了囚車。解送朝廷處分。妻孥逆黨。盡行誅戮。看從者監下。死事者紀錄。候旨定奪。凡我行陣。一概論功行賞。速令人報知王司徒。教他放二位夫人出監。待我掃清餘孽。即便凱旋回朝。〔合〕

愁績豐庸。捷書奏九重。天顏有喜。皇恩擬報功。皇恩擬報功。

驃姚立大功。

萬里絕烟烽。

馬放華山下。

車書已大同。

第二十七齣

蘇獄

〔祝英臺〕〔老旦丑扶上〕嘆拘攣囚羸里。長夜渾如歲。〔旦〕缺月沈暉。鏡去人將逝。

〔丑〕怎能穀再覩青天。重逢甘雨。〔合〕雪前恥闔門完聚。〔老旦〕〔搗練子〕耿耿

淚潺潺。愁來兩鬢忽成斑。〔旦〕銀箭銅壺宵漏永。羅衣不耐五更寒。〔老旦〕媳婦。我和你久繫獄中。

不能擺脫。前日蒙王大人持書去報孩兒。未知他能除此賊。以解我倒懸之厄否。〔旦〕朋友在難。尙

然相恤。豈有母親妻子而不顧乎。丈夫早晚必有安全之計。婆婆且自寬心。〔老旦〕又一件。我多感

你令堂照顧。不意一旦拋離。辜負厚恩。深爲可恨。〔旦〕至親骨肉。分所當然。但情鍾兩地。天各一方。

母親不能親來一探婆婆。此心不能無歎。〔丑〕老夫人和小姐不必愁煩。倘我老夫人掛念。早晚來

此相探。亦未可知。〔老旦〕萬水千山。怎生得到。〔貼上〕

〔霜天曉角〕登山渡水。去國遙千里。苦憶姻家兒女。心忙豈憚馳驅。花正開時遭
雨打。月當明處被雲遮。老身只爲親母女兒。被王敦屈陷於獄。今日不憚千里。特來相探。這里正是
司獄。不免進去相見。禁子開門。〔末扮禁子上〕牢門重鎖鑰。不許外人敲。你這婆子好不達時務。你
是何人。來叫禁子。〔貼〕我是劉太尉的母親。要相見溫老夫人。〔末〕原來是劉老夫人。禁子有罪。就
開門。〔報介丑〕我道老夫人一定來。昨夜夢見牙齒相打。〔老旦〕爲何。〔丑〕有肉喫。〔貼進介〕老
旦相抱哭介。〔貼〕親母無罪無辜。罹此大禍。〔老旦〕命塗多舛。不敢怨尤。〔旦〕奴家苦遭挫折。辱及
慈親。〔貼〕女兒雖在縲紲。非其罪也。〔老旦〕親母多承遠顧。甚慰渴懷。但老身衰齡構難。形存心死。
無可以報厚德。〔貼〕義在瓜葛。何說此話。今日之事。有賢壻小兒在外。必能委曲濟難。決無玉石俱
焚之理。不必愁煩。〔旦〕母親言之有理。只是目下難過。〔老旦〕

〔綿搭絮〕久羈囹圄。鎮日鎖雙眉。況我老病疲羸。桎梏晨昏苦怎支。嘆當時課
子詩書。指望你榮歸戚里。光耀着門楣。今日呵。反被你遺累妻孥。身陷俘囚履
禍機。〔旦〕憂心如醉。未語淚先垂。娘。自別尊顏。一日思親十二時。隔溫清冷落

了斑衣。苦背卻姑親慈恃。兩下離披。娘。今日裏陷溺淪胥。辜負當年親結褵。〔貼〕

自你身擔狴犴。我倚遍着門閭。恨不得插翅飛來。恤患分憂相護持。逆賊。你流毒

善類。是何道理。恨奸雄恣肆狼威。拆散你夫妻子母。骨肉乖違。親母孩兒。你休道

上帝無聞。作善從來天不欺。〔旦〕一從夫去徹夜相思。夫。我和你琴瑟乖張。違

卻當年白首期。夫。你不記當時對泣牛衣。今日裏將奴拋棄。中道與你分離。向

日把玉鏡寄還夫君去了。切恐破鏡難圓。羞對孤鸞獨自飛。〔丑〕流離顛沛。怒似

調饑。憔悴了豔質芳華。多病多愁減帶圍。困纍纍命若懸魚。苦我好似隨風飛

絮。浪蕩遠天涯。苦捱不過幾個黃昏。愁伴蕭蕭鼓角悲。〔淨扮獄官上〕沙場擒逆豈

獄出俘囚。獄官奉王司徒嚴命。道王敦已被誅戮。快請溫家二位夫人出監。禁子快開牢門。〔淨跪

見介〕老夫人。小夫人。一同賀喜了。〔旦老旦〕呀。我有何喜可賀。〔淨〕告夫人。王敦已被溫樞密誅

了。王司徒傳命教請二位夫人出監。聞知劉老夫人來此。一同送至公館安下。少間樞密就回來相

會了。〔貼老旦旦〕呀。元來王敦這賊子誅了呵。謝天謝地。〔淨〕轎馬俱在門首等了。請三位夫人

就此啟行〔合〕

〔餘文〕經年漂泊身狼狽。陽春忽布網羅除。豈料光生腐草餘。

〔老旦〕干戈擾攘幾年餘。

〔貼〕搔首欣看奏捷書。

〔旦〕善惡到頭終有報。

〔合〕只爭來早與來遲。

第二十八齣 賞雪

〔步步嬌〕〔旦上〕困歷經年方離狂。歲律旋將變。朔風透體寒。路隔崇朝。咫尺行雲斷。萱草欲凋顏。轉向愁中慘。睡覺不知雪。但驚窗外明。漫天飛六出。和月照三更。草木淺深白。郊原上下平。旅懷苦嗟怨。誰與寄邊城。奴家與婆婆久淹縲絏。自分捐生。不料反賊受勦。王司徒將我姑媳釋放。假館僑居。服御飲食。皆出尙方供應。當初在獄。這等貧寒。如今這等豐富。人生遭遇不齊如此。今日大雪紛紛。不免請婆婆婆母親出來。圍爐賞宴。以慰悶懷。多少是好。二親有請。

〔貼老旦上〕

〔前腔〕久困衡陽堪嗟嘆。何幸得重歡宴。微軀賴苟全。涸轍重回。合浦沈珠返。

翹首盼關山。游子何時見。〔老旦〕長對西風嘆式微。今朝何幸賦歸歟。〔貼〕故園松菊猶存否。

〔旦〕舊日人民果是非。〔老旦〕親母。我姑婦二人。久罹困厄。只道喪身草莽。豈料死中得生。〔貼〕親母。自古道作善降之百祥。作不善降之百殃。今日親母獲福完歸。王敦賈禍誅滅。理勢必然也。〔旦〕二親。且喜危而復安。否中生泰。值此三白之盈庭。可以轉災而爲瑞。宜獻酬樽俎爲慶幸。〔貼〕旣如此。捲起毡幃。傳盃玩賞。〔貼〕〔如夢令〕瓊樹玉麈罩滿。暖閣紅爐裝遍。〔老旦〕困蕊不禁寒。摧折柔枝無限。〔旦〕腸斷。腸斷。人共楚天俱遠。〔老旦〕

〔梁州序〕碧空鋪絮。彤雲垂幔。玉界瓊洲如練。祥光呈瑞。西疇已兆豐年。自喜白頭相聚。雪恥重歸。羨茗相酬勸。羊羔傾繡幕。且同歡。往事休將入夢牽。〔合〕臣績懋。君恩顯。看全家祿養承天眷。盡子職。遂親願。〔貼〕窮冬將逝。洪鈞初轉。窗外日添宮線。灰飛葭管。新陽漸破嚴寒。自喜分氈來訪。返棹同還。旅食開華饌。昨聞駟報。知我兒奏功江北。賢壻奏功江南。可喜可喜。隴頭逢駟使。羽音傳。會見聯車共凱旋。〔合前旦〕杜重門。顧影蕭然。褪膏沐香雲繚亂。嘆羅浮夢遠。楚臺雲散。丈夫。

你雖是功收淮蔡。只恐馬阻藍關。旅泊如天遠。倚欄腸欲斷。對孤鸞。玉鏡何時得再圓。〔合前丑〕抱寒衾。悄夜忘眠。倚薰籠。離愁無限。苦銀屏冷落。香銷紅怨。且學那撒鹽歌詠。煮雪烹茶。拚醉聊排遣。灞橋頻望遠。寸心懸。何日征人得解鞍。

〔合前貼〕

〔節節高〕雪花舞玉盤。罩滿瓊簷。乾坤一夜銀妝遍。冰壺湛。玉笋纖。珠宮燦。
〔老旦〕親母。敝裘得荷綿袍戀。窮途何幸逢青眼。〔合〕漸覺樓頭轉。東風往咎前愆。盡逐冰澌渙。〔貼〕熹微啓暮天。缺月重完。清光幸喜仍還見。孩兒賢婿如今呵。役車旋。錦色鮮。榮里閤。〔老旦〕三牲五鼎叨君宴。光生白屋把窮愁換。〔合前〕
〔餘文〕天涯咫尺無由面。別易從來相見難。遙對南關淚暗彈。

〔老旦〕暴虎當年罹鞠誚。

〔貼〕一朝脫悔喜重重。

〔旦〕夜來賸把銀缸照。

〔合〕猶恐相逢是夢中。

第二十九齣 南北凱旋

〔一枝花〕〔生上〕窮林高鳥盡。威德華夷震。干戈今載戢。返戎軫。四海澄清。從此無血刃。吾民方解慄。瞻望神京。喜皇極重開元運。五載馳驅戎馬間。擲夷誅叛凱歌

還。投簪早上朝天表。戲彩重承膝下歡。溫嶠外平強寇。內翦賊臣。乘輿反正。班師回朝。昨聞我母妻

岳母皆在公館安下。患難之餘。急欲相見。正是他鄉千里夢。故國一時心。左右。催促夫馬前行。〔末

丑〕稟爺。天色將晚。且在句容駟安下。明日回朝。〔行科生〕

〔風馬兒〕戡內亂。獲醜執訊。荷封榮纍纍金印。望天門來朝紫宸。聊展我經綸。蘊解組辭歸作逸民。作逸民。〔淨扮駟官上〕郵亭居要道。星節此停驂。句容駟丞接老爺。

〔生進介〕駟丞。我鞍馬勞頓。不許閒雜人打攪。來日雞鳴時就要起身。〔淨〕領鈞旨。〔虛下外扮劉

琨上〕戡外亂。新平獫狁。繫呼韓聊舒宿忿。綏淮夷皆來獻琛。廓堯封紆忠悃。

羈鳥今歸戀舊林。戀舊林。邊庭百戰壯謀猷。西北強胡一旦收。虜馬不嘶葱嶺外。悲笳聲斷玉

關頭。形容已繪麒麟閣。官職今封定遠侯。持節歸來拜明主。陳情還作故鄉游。劉琨自與祖元帥擊

楫渡江已來。不覺五載。今幸削平燕趙諸國。返軫回朝。爭奈久疎定省。歸心箭發。連日奔馳。且喜已

到金陵地面。正是歸促頓忘車馬倦。心忙不解夕陽斜。左右天色已晚。且向句容駟安歇。駟丞怎生不見。〔丑叫介淨上〕駟車日夜紛來往。駟使奔忙腳跟來。來了來了。怎得許多人夫轎馬打發。真個好苦呵。〔外〕這駟丞好打。怎生來遲。〔淨〕告爺。駟丞有罪。方纔迎接溫樞密。不知老爺來到。望乞恕罪。〔外〕我的妹丈也來了。不期而會。天使之然。就進去相見。〔見介外〕恭喜妹丈。勦除國賊。迅掃禁庭。返播遷之輿。建中興之業。〔生〕恭喜尊舅。蕩平劇虜。稽顙呼韓。絕北顧之憂。雪永嘉之恥。〔末丑〕二位老爺聯轡凱旋。光榮帝里。世間難得。〔外〕側聞親母與吾妹被逆賊拘繫於獄。其情卻爲何。〔生〕尊舅。一言難盡。

〔一封書〕自那日奉別呵。邊城返戰輪。向丹陽代叛臣。觸狼威怒噴。駕飛硤及我親。逆賊監母妻子獄。遣說客逼令寫書。招下官降順。母妻誓死不從。姑婦丹貞天垂憫。多承岳母遠來相探。賊平之後。王司徒同請到公館安下了。〔外〕家母也來此。真個是天緣。〔生〕枯木今來復遇春。〔合〕和你覲明君。報親恩。晝錦榮歸指白雲。〔外〕自從與妹丈別后。連戰大勝。如今劉石諸番。皆已竄居沙漠去了。當時獨秉鈞。淨妖氛建大勳。喜狼星盡隕。萬里堯

封復鼎新。妹丈和你望闕陳情求解印。三釜還酬報母心。〔合前〕

〔餘文〕今宵旅邸同高枕。明日辭君歸養親。脫卻兜整帶葛巾。〔生〕左右。先着幾人飛馬星夜報與二位太老夫人知道。說劉爺在邊上也同回來了。

〔生〕玉帛朝回望帝鄉。

〔外〕克清大定樂時康。

〔卒〕天涯盡處無征戰。

〔合〕兵氣銷爲日月光。

第四十齣 完聚

〔步步嬌〕〔老旦上〕嘆當時逆旅遭窮困。只道合室摧鋒刃。〔貼〕誰想相逢在此辰。須知離合皆前定。〔旦〕伉儷喜重諧。不負山盟信。〔老旦〕幾年身世各浮萍。白首相看泪滿纓。〔貼〕老去不知花有態。愁來惟覺酒多情。〔旦〕花逢逆旅容偏瘁。月向朱門色更明。〔合〕今日重逢且歡笑。開罇共享太階平。〔老旦〕親母。恭喜。大舅亦回。雙台並照。光耀人間。〔貼〕世間盛事。萃于一門。今日方顯吾二人教子之功。孩兒。何不差人路上一接。〔旦〕早已差人去了。牌上說寅時起馬。想必就到。〔丑末上報介〕烏頭作相同。聯轡拜親幃。聖朝恩浩蕩。草木也光輝。伏太老夫人。

溫爺劉爺回來了。(生外上)

〔夜行船〕五載身先當白刃。扶社稷救生民。愛日情深。望雲心切。辭祿今從招隱。(見悲介生)母親孩兒罪累逆天。致使慈親受禍。萬死不足以贖。岳母荷蒙周恤。賴庇生全。賢妻奉母孝敬。節操堅持。修書寄鏡之情。尤爲可憫。(外)母親久別尊顏。寸腸千結。親母吾妹年幼。有缺奉事。賢妹勤儉相夫。克全四德。允宜表揚。(貼老旦)二郎雖然受了幾載辛勤。今幸功成名就。耀祖榮親。封妻蔭子。乃人間之大樂也。往事休題也罷。(旦)哥哥出將入相。功懸日月。足紹先人之盛。相公離愁萬千。待歸款訴。今既見君。不覺喜心。翻倒半句也無。(生外)骨肉重逢。天倫攸斂。須假樽壘。以酬具慶。(貼老旦)正當如此。(生)

〔排歌〕憶別慈親。今經五年。苦遭王事縈牽。雲橫秦嶺路漫漫。千里思親幾淚漣。(合)平國難。奏績還。狼胥山上姓名鐫。今生分宿世緣。夫妻子母兩團圓。(外)旅邸雲萍。庭闈暮萱。堪憐兩地心懸。望雲幾上太行巔。今幸承歡拜膝前。(合前旦)信斷雙魚。鏡分兩邊。那日被難之時呵。此生自分溺深淵。今日呵。魚水何期再

合歡〔合前生〕夫人自與你別後呵。雲鎖巫陽。霜凋楚關。堪悲鄉夢闌珊。那日接得母親

翰簡。與夫人玉鏡。幾乎痛絕。當時鏡破鳳離鸞。琴瑟于今再整絃。〔合前老旦〕孩兒自

你別後呵。頻倚門闥。雙眸望穿。著龜朝夕。頻占密縫。人去抱憂煎。今日榮歸始

解顏。〔合〕你看蟬冠重。錦綬鮮。紅纓白馬壯奇觀。繩祖武。啓後賢。蘭蓀桂子競芳

妍。〔貼〕昔日呵。女困俘囚。兒淹外藩。終朝意馬心猿。喜今脫悔壁重還。文命遙臨

新故園。〔合前丑末扮報人上〕金殿九重明日月。泥金一札下雲霄。告爺。朝廷有詔旌表。快排香案

迎接。〔下小外扮使臣齎詔上〕

〔六么令〕絲綸燦爛。彩鳳親脚飛下九天。陽春頃刻播人間。褒節義表忠賢。

〔合〕闔門堪羨承恩眷。聖旨已到。跪聽宣讀。皇帝詔曰。朕惟世道莫重乎綱常。人倫必先於

忠孝。實風化之攸關。當激勸以勵后。予一人遭家不造。戎馬在郊。二帝蒙塵。兩京失守。近賴皇天悔

禍。羣寮誓心。驅劉石于沙漠。勸王敦于方內。日月生光。寰宇再朗。樞密溫嶠。絕裾激憤。慷慨赴義。其

母崔氏。妻劉氏。身居狸狌。而婦姑之大分不渝。太尉劉琨。聞雞起舞。枕戈餐胡。其母溫氏。教淑義方。

而子婿之武功克奏。此其忠貞節孝。有光於國家者。特封溫嶠始安公。崔氏淑德夫人。劉氏太原郡夫人。劉琨魏國公。溫氏碩德夫人。他若司徒王導之大義滅親。故將祖述之中流擊楫。周顛戴淵之蹇蹇孤忠。郭璞王彬之諤諤諱論。或以勞定國。或以勤死事。存者超擢。沒者追恤。王敦首行造逆。國有常刑。羽翼沈充。錢鳳王含等戮止其身。脅從者盡行赦宥。嗚呼。興衰撥亂。係國家氣運之隆。彰善殫惡。實王朝勸懲之典。善惡之報。天道王章。昭昭明矣。尙念之哉。望闕叩謝。〔山呼介生外〕使臣請坐。〔小外〕不須了。正是君臣交慶風雲會。草木均霑雨露恩。〔下生〕

〔催拍〕我昔日呵總元戎。叨登將壇。今日呵措天下如磐石安。喜旋坤轉乾。旋坤轉乾。牛放桃林。馬息華山。名遂功成。進職加官。〔合〕辭帝闕。解組東還。依桑梓樂田園。〔外〕憶當時符分玉關。幸今日鵬搏羽翰。曾浴日補天。浴日補天。尊國攘夷。封土泥丸。錫爵分茅。鳳舞龍攀。〔合前旦〕恨疇昔零落翠鈿。喜今朝鸞膠續絃。看霞帔鳳冠。霞帔鳳冠。雨露沾濡。車馬駢闐。春盎朱門。喜溢眉端。〔合前貼〕
〔老旦〕念佳兒聯車凱旋。荷明主褒功尙賢。更裕後光前。裕後光前。汗簡垂名。

詩禮相傳。奕葉雲仍。槐棘森然。〔合前貼老旦〕

〔一撮棹〕羨二郎忠孝兩全。〔生外〕龍顏喜動。恩榮慰我慈顏。〔旦〕新渙汗。六龍飛下雲間。〔合〕河清頌。共祝太平年。但願四方風動閭閻。歌聖澤。鼓腹含哺永

永樂堯天。

〔餘文〕前朝懋績標詞翰。玉臺鏡記爛雲編。千古名揚四海傳。

永嘉弗兢國衰微。

絕裾溫郎倡義旗。

淮渡燃犀還擊楫。

新亭灑淚復聞雞。

枕戈北塞胡塵淨。

擊犢南都免窟夷。

玉鏡分開還復合。

縱橫遺跡總堪奇。

玉鏡臺記終